

四庫全書

史部

欽定四庫全書

史部

浙江通志卷

三十九
四十

詳校官給事中臣戴璐

檢討臣德生覆勘

總校官編修臣倉聖脉

校對官學正臣湯垣

謄錄監生臣陸鼎

欽定四庫全書

浙江通志卷三十九

古蹟

浙自吳越肇封以來上下幾千百年其間城郭宮室園林臺榭名賢之所興建達士之所登臨以及一名一物之奇雖世遠年湮不盡存於今日而流風餘韻可攷而知搜羅舊聞以廣覩記載筆者之職也志古蹟

杭州府

上

古州城 元豐九域志古州城隋楊素創太平寰宇
記隋置杭州在餘杭縣十年移州理錢塘十一年

復移州於柳浦西依山築城即今郡是也

互見
城池

謹按隋書開皇九年平陳更置各州縣太平寰宇記所云十年乃文帝之開皇也

吳越國城 吳越備史唐大順元年王命築新夾城

環包氏山暨秦望山而迴凡五十里皆穿林架險

而版築焉景福二年王率十三都兵洎役徒二十

餘萬衆新築羅城自秦望山由夾城東亘江干洎

錢塘湖霍山范浦凡七十里

錢受徵吳越國治攷舊城門凡十朝天門

在吳山下今鎮海接龍山門在六和塔西竹車門在望仙橋東南新門在炭橋東南上門在薦橋門外北上門在舊菜市門外鹽橋門在舊鹽橋西西關門在雷峰塔下北關門在夾城巷寶德門在艮山門外無星橋蓋當時城垣南北展而東西縮故曰腰鼓城也錢鏐杭州羅城記大凡藩籬之設者所以規其內溝洫之限者所以虞其外華夏之制其揆一焉故魯之祝丘齊之小穀猶以多事不時而城況在州郡之內乎自天下兵革而江左尤所繁併余始以郡之于城歲月滋久基址老爛狹而且卑每至黠閹士馬不足迴轉遂與諸郡聚議崇建雉堞夾以南北矗然而峙帑藏得以牢固軍士

得以帳幕是所謂固吾圉以是年上奏天子嘉以
拙政優詔獎飾以為牧人之道其盡此乎俄而孫
儒叛蔡渡江侵我西鄙以剪以逐蹶於宛陵勁弩
之次泛舟之助我有力焉後始念子城之謀未足
以為百姓計東謁巨浸幘閩粵之舟櫓北倚郭邑
通商旅之寶貨苟或侮劫之不意攘偷之無狀則
向者吾皇優詔適足以自榮由是復與十三都經
緯羅郭上上下下如響而應爰自秋七月訖於冬
十有一月由北郭以分其勢左右兩翼合於冷水
源綿亘若干里其高若干丈民庶之負販童髻之
緩急燕起之車蓋及吾境者俾無他慮千百年後
知我者以此城罪我者亦以此城苟得之於人而
損之已者
吾無愧與

宋禁城 宋史高宗本紀建炎三年升杭州為臨安

府紹興八年定都三十一年五月增築禁城

咸寧
臨安

志建炎三年二月詔以州治為行宮紹興元年十一月詔守臣徐康國措置草創二年九月南門成詔名曰行宮之門三年詔梁汝嘉創廊廡於南門之內十八年名南門曰麗正北門曰和寧東苑門曰東華二十八年增築皇城王同祖夜步內門詩靜夜高燈人未眠等閒行過內門前一聲唱徹連珠喏碧月朱闌綠柳邊

鹽官縣古城 嘉靖海寧縣志在縣西北四十一里

隋大業十三年築唐永徽六年又築周回四百六

十步濠濶五丈深四尺今不存

互見
城池

管城 至元嘉禾志吳王築四城以禦越管城屬鹽

官

東安郡城 名勝志東安郡城在富陽縣北十八里

吳黃武中郡守全琮築

富陽縣舊城 名勝志富陽縣古城唐咸通十年縣

令趙訥築去今城二百七十步富陽縣志元至正

十六年楊完者重築後毀慶春河即古縣城濠

永寧寺城 宣德富陽縣志在榮國寺西北隅即今

永寧寺

咸淳臨安志城周十二里有屋七百十九間警樓十二座舖舍一百十九所五代時

城在縣東南錢氏以地逼江乃壘碑礫為之富陽縣志元至正十六年重築今不存

餘杭縣舊城 咸淳臨安志餘杭縣舊城在溪南後

唐時號為清平軍城

成化杭州府志莫詳所始

營盤城 萬厯杭州府志在餘杭縣南一里至正十

六年楊完者即溪南舊城內築以守禦號為營盤

城

舊倉城 咸淳臨安志在餘杭縣東南二里安樂山

上唐永貞五年刺史張綱奏置倉宇四十二間天寶八載採訪使奏置常平倉同在城內錢氏廢倉建寺今名法善院倉址仍存

東安鎮城 吳越備史大順二年秋七月城東安鎮

咸淳臨安志因山為城吳越錢王都將杜稜築

羅漢

東安鎮新築羅城記杭之別郡舊有八都之目而東安主領太師杜公尋以擒薛朗於京口破丁從實於毘陵天子寵之拜常州刺史遂屬其兵於子弟馬撫於內者曰建思禦於外者曰建徽經度於季孟之間者曰建威洎太師解印而歸淮叛肥倫連壓封郛元帥大丞相彭城王始授君以板築之

要濠塹之廣袤地里之橫亘皆取則於大丞相鳩
其民人相其險易惟師有令衆克從之起大順辛
亥訖於明年端午歲西離連坎接隆者就之窪者
盈之民不弛擔時不妨農夏五月甲辰太師犒羣
帥於城下若杵若畚者皆與焉不三四年淮南節
度楊氏行密擾我疆境而東安尤為其所忌行密
滅安仁義之精銳分田頤陶雅金威之敢勇以攻
東安城樓櫓翔空矢石交逆朔日我軍憑其城斃
賊將於城下者其數盈千濠塞塹堙自是羣寇不
復有圖南之意是知人非城則無以為捍城非人
則無以自固不有城也人何以安不有將也城何
以堅噫天下之無事也吾鄉則有河間凌準宗一
濮陽吳降下已汝南袁不約還樸以文學進天下
之有事也吾鄉則有大師建徽伯仲及諸將佐以
武藝稱豈文武之柄倚伏而然也抑江山稟受與
時消息者乎太師以錫金勒石見徵不敢堅遜乾

寧五

年記

於潛縣舊城 嘉靖於潛縣志在縣北二百四十步

隋開皇十三年楊素築

互見
城池

潛州城 咸淳臨安志在於潛縣東七里置潛州時

築今地名城嶺

紫溪城 咸淳臨安志在於潛縣南三十里潛川鄉

城復村

名勝志遺址在紫溪之上成化
杭州府志唐置紫溪縣時築

越王城 咸淳臨安志在於潛縣東十五里阿頂山

夏后少康之後封於越其支庶或居此今城址猶在又名平越城下有平越村其址與皇甫巖近

新城縣古城 萬厯新城縣志古城在縣東南唐時築

四門城 成化杭州府志新城縣又有富春桐江新鎮祠堂四門城今圯濠與遺址僅存

吳越國治 吳越備史梁龍德二年王建天下元帥府於興國門之右

吳越國治攷國治在鳳凰山下即鎮海軍使院唐以前州治也

欽定四庫全書

卷三十九

其子城南為通越門北為雙門錢氏納土後二門猶存咸淳臨安志州治只載錢氏造而不言在鳳凰山下政和二年孫沔守杭蔡襄為撰雙門記內云吳越王依山阜以為治是錢氏宮室在鳳凰山無疑南渡即其地為行都後人但知宋都而不知錢氏其立鐵幢識射湖處去鳳凰山僅二百步許此足為證也羅隱鎮海軍使院記鎮海軍舊治京口大丞相以錢塘之眾東提漢宏西殲逆朗天子不易其土故自符竹四命然後移軍於錢塘生物以宜租賦以便斥去舊址廣以新規廊閣閭閻拔起階級俾幢節之氣色貔貅之出入得以周旋焉庚申年始闢大廳之西南隅以為賓從宴息之所左界飛樓右劇嚴城地皆勢峻面約昔敵肥樞巨棟間架相稱雕煥之下朱紫苒苒非若越之今而潤之舊也其府屬以下或八都舊將或從公於征或稟之於朝廷或拔之於鄉里故天子用清宮傳

道之選以佐之輟教民論道之任以副之其餘省
秩卿曹職領相次自我朝藩服官屬之盛無加也
噫大丞相之勲德既藏之天府而攀鱗附翼者非
鐫刻礫石其可久乎是年冬十月始命觀察判官

羅隱

為記

吳越宮室 五代史吳越世家梁龍德元年稱吳越

國王更名所居曰宮府曰朝

吳越蘭史天祐二年
建功臣堂於府門西

天成三年王親祀於都會堂初名八會亭六年麗
春院火王遷居瑤臺院之綠雲堂大穆王治府於
城北孝獻會王以采戲於青史樓六年九月王即
位於仙居堂是月遷於思政堂七年以龍山武功
堂為文穆王廟開運三年重建天寵堂四年二月
有雉集於玉華樓七月有雉升於天冊堂戟門十

二月迎王於義和後院顯德二年七月有虹入天
長樓在內城之東建隆元年大慶堂成咸淳臨安

志中和堂錢王

閣禮堂舊址

吳越營屯 吳越備史廣明元年杭州始建八都五

代史吳越世家團諸縣兵為八都以鏐為都指揮

使

吳越國治攻營屯凡六白壁營在城南上隅寶
劍營在鍾公橋北青宇營在顯橋東福州營在

梅家橋東馬家營在修文坊大路營在諸家

塘咸淳臨安志衣錦營在臨安縣石境山

吳越郊臺 武林舊事上石龍永壽院錢王郊臺近

馬又名登雲臺

宋宮室 宋史高宗本紀建炎三年駐驛杭州即州

治為行宮

徐一夔南宋行宮攷宋行宮在鳳凰山下即唐以來州治其宮殿之制文德殿

謂之正衙垂拱殿謂之常朝紫宸殿上壽御馬大慶殿朝賀御馬明堂殿宗祀御馬集英殿策士御馬此四殿即文德殿隨事揭名非專建也後殿有四崇政殿一名祥曦福寧殿寢息之所復占殿燕閒之所延和殿在垂拱之後遇齋戒御馬選德殿孝宗建以為射殿緝熙殿理宗闕以為講殿熙明殿度宗改東宮之益堂為之而講筵延閣並在禁中至於東宮初無定制如孝宗之資善堂度宗之益堂皆在禁中遂以為就學之地又有欽天孝思二殿以奉神御則仍東都之舊制武林舊事故都宮殿門曰麗正和寧東華西華苑東苑西北宮南宮南水東水會通上閭宣德隔門斜門闕門玉華

閣門舍和貽謨二門在天章閣其正殿曰垂拱文
德大慶紫宸集英後殿曰延和崇政即祥曦福寧
復古選德緝熙熙明明華清燕膺福慶瑞射殿需
雲符寶嘉明明堂即文德坤寧穠華慈明慈元仁
明進食即勤政欽先孝思清華堂曰翠寒澄碧觀
堂芳春凌寒鍾美燦錦燕喜靜華清賞稽古清遠
清徹澄碧藻淵環秀文園書林華館行秀披香德
勤雲錦清霽綠萼華又名瓊安碧琳凝光澄輝繡
香呈芳會景正始怡然信美齋曰損齋彛齋謹習
燕中樓曰博雅觀德萬景清暑清美明遠倚香閣
曰雲章清華凌虛清漏倚柱來鳳觀音芙蓉萬春
臺曰欽天宴春秋芳天開圖畫舒嘯踰臺軒曰晚
清閣曰清華宸思怡真容膝受釐綠綺觀曰雲濤
亭曰清泳清趣清暉清顥清迴清隱清寒清激清
翫清興靜香靜華春妍春華春陽春信融春尋春
映春餘春留春皆春寒碧寒香香瓊香玉香界碧

岑澹碧瓊英瓊秀明秀深秀衍秀濯秀錦烟錦浪
繡錦萬錦麗錦叢錦錦照粧流綺綴金綴瓊穠香暗
香晚節香巖香雲岫映波含輝達觀秀野凌寒涵
虛平津真賞芳遠垂綸魚樂噴雪流芳芳嶼玉質
此君聚芳延芳蘭亭激湍崇峻惠和浮醴泛羽凌
宮迎薰會英正巳丹暉凝光雪徑參月共樂迎祥
瑩粧植杖可樂文杏壺中天別是一家春園曰小
桃源杏塢梅岡瑤圃村莊桐木菴曰寂照怡真城
曰瑪瑙洗馬橋曰萬歲清平春
波玉虹教場曰南教場北教場

宋德壽宮 宋史高宗本紀紹興三十二年六月名

新宮曰德壽

忠梁錄在望仙橋東高廟倦勤命建
宮殿以德壽為名後生金芝改殿曰

康壽高廟雅愛湖山於宮中鑿一池引水注入壺
石為山象飛來峰有堂曰冷泉孝宗曾賦長篇玉

堂雜記德壽宮中分四地隨時游覽東地分香遠
清深月臺梅坡松菊三徑清妍清新芙蓉岡南地
分載忻射廳臨賦賦燦錦至樂半丈紅清曠瀉碧西
則冷香文杏靜樂浣溪北則絳華俯翠春桃盤松
嘗見御製盤松贊墨本又見御製祭土地文咸淳
臨安志孝宗受禪移御德壽宮改曰重華後憲明
皇太后后御改曰慈福壽
域皇太后后御改曰慈壽

宋諸閣 玉堂雜記諸閣皆在禁中藏祖宗御書圖

籍寶瑞

建炎以來朝野雜記太宗龍圖閣真宗天
章閣仁宗寶文閣神宗顯謨閣哲宗徽猷

閣徽宗敷文閣高宗煥章閣孝宗華文閣光宗寶
謨閣寧宗寶章閣理宗顯文閣太祖英宗無御集
故不

設閣

宋郊廟 宋史高宗本紀紹興四年詔祀明堂作行

禮殿於教場五年建太廟於臨安十三年築園丘

建景靈宮

咸淳臨安志郊丘在嘉會門外龍華寺西壇四成分十二陛陛七十二級青城

齋宮及望祭殿以幕屋為之大殿曰端誠便殿曰熙成外為泰禮門祭用元祐郊禮合祭天地設大神大示及太祖太宗配位并從祀諸神凡七百七十有一明堂即文德殿太廟在瑞石山左正殿七楹分十三室太祖太宗真宗仁宗英宗神宗哲宗徽宗欽宗高宗孝宗光宗寧宗又設配饗功臣位於橫街南太祖趙普曹彬太宗薛居正石熙載潘美真宗李沆王旦李繼隆仁宗王曾呂夷簡曹瑋英宗韓琦曾公亮神宗富弼哲宗司馬光徽宗韓忠彥高宗呂頤浩趙鼎韓世忠張俊孝宗陳康伯

史浩光宗葛泌寧宗趙汝愚諸室之西奉僖順異
宣四祖廟有冊寶殿齋殿致齋閣子景靈宮在新
莊橋西內有蟠桃亭流杯堂跨水堂梅亭四井堂
橋圍柱所南為崇禋館齋宮在錢湖門外惠照昭
慶二院夏至祭皇地祇立夏祭熒
感南岳瀆立秋祭白帝西岳瀆

謹按咸淳志載配饗功臣惟欽宗無功臣故缺焉
田汝成西湖志誤認為欽宗缺祀殊不知欽宗升
祔月日見於宋
史不可誣也

宋諸壇 建炎以來朝野雜記紹興十六年饗先農
於東郊築高禩壇十八年築九宮貴神壇於東郊

咸淳臨安志先農壇高禩壇在嘉會門外九宮貴
神壇在東青門外海神壇在太平橋東淳祐中以

依海建都宜以海神為大祀臨
安府社稷壇在小昭慶寺側

宋官署 徐一夔官署攷宋南渡省臺寺監俱可指
數若其倉庫所局諸邑公署不能一一悉舉入元

以來其地或為官舍或為民居遺基猶能指而

言之

咸淳臨安志三省樞密院在和寧門北都堂
在樞密院恩堂在都堂後經武閣在樞密院

中書門下後省在都堂西有紫微閣寧宗御書檢
正左右司在諫院右承旨檢詳編修在樞密院御
史臺在清河坊北向取嚴肅之義朝堂即臺廳西
序列東都御史名宇南渡後列於東序廳以內為
御史閣位諫院在後省西廳市列諫官題名六部
在三省樞密院南有論思獻納之堂後有望江亭

在山上太常寺在羅漢洞有宣清堂昭勲崇德閣
文武勲臣二十三人繪像其中寶庫在東廡藏祭
器樂器玉牒所宗正寺在太廟南有玉牒殿祖宗
屬籍之堂大理寺在仁和縣西雲章亭在中門列
累朝獎諭獄空勅有明清堂在廳左楮亭在池上
司農寺在保民坊有祥扈堂太府寺在保民坊秘
書省在天井坊有右文殿秘閣列累朝御製御書
國史院在右文殿東道山堂在秘閣後著作之庭
在道山堂後國史日厯所編纂會要所書庫寶庫
後圃渾儀臺勅令所在侍御橋南國子監在紀家
橋芳潤亭在後圃書板庫在中門內特作監軍器
監並在保民坊大宗正司在天慶坊有屬籍之閣
茶鹽所會子所公田所封椿安邊所並在三省大
門內登聞檢院登聞鼓院在麗正門外左右闕之
南都進奏院在朝天門外官告院在部門內糧料
院在漾沙坑審計司在保民坊權貨務都茶場在

通江橋東雜買務雜賣場在通江橋東大思院在
北橋之東左藏庫在清湖橋西封橋上庫在三省
大門內封橋下庫在左藏庫中門內安邊太平庫
在下庫南車輅院在嘉會門外御前軍器所在禮
部貢院西和劑局在太府寺內惠民局凡五南在
三省前西在衆安橋北北在市西坊南外局在浙
江亭北外局在北郭省倉上界在天水院橋中界
在菜市橋下界在東倉鋪豐儲倉在仁和縣側倉
橋東西倉在左家橋端平倉在德勝橋淳祐倉在
斜橋南平糴倉在仙林寺東咸淳倉在東清門內
軍寨北草料場在天水院橋西紙局在赤山湖濱
驢驢院在漾沙坑象院在嘉會門外麗正門右馬
軍司在保民坊步軍司在鐵冶嶺閤門在和寧門
外宗學在睦親坊有大成殿御書閣明倫堂立教
堂汲古堂齋舍太學在前洋街有大成殿首善閣
光堯石經之閣崇化堂武學在太學東有立武堂

齋舍禮部貢院在觀橋西別試所在大理寺西太史局在吳山大醫局在通江橋北中興館閣繙錄秘書省運儀臺以東岡改築又有羣玉堂本名羣玉亭改後樓綸書榜芸香亭蓬萊舊名錦隱倪思書榜天教本名汗青軒楊簡書榜夢梁錄本州貢院在錢塘門外王家橋以待本州士人發解之處兩浙漕司貢院在北關門外待兩浙路寓之士及有官人宗女夫發解之處

宋府第 古杭雜記南渡後都城戚里臣僚府第略

依東都舊制

乾道臨安志左右僕射府在壽域坊南樞密知院府在天慶坊執政府在

天慶坊南副漑王府在軍將橋之東吳王府在後洋街並王府在中沙巷睦親宅在清湖橋之東臺諫宅在太常寺西百官宅在石灰橋夢梁錄左右丞相叅知政事樞密院使簽書並在南倉前大渠

口侍從宅在都亭驛東臺官宅在油車巷省府官
屬宅在開元宮對御監郎官宅在俞家園七官宅
在郭婆井五官宅在仁美坊三官宅在潘閭巷十
官宅在舊睦親坊六房院在湧金門東五房院在
楊和王府西孟太后宅在後市街韋太后宅在薦
橋東邢皇后宅在薦橋南吳太后宅在州橋東郭
皇后宅在佑聖觀後夏皇后宅在豐樂橋北謝皇
后宅在豐禾坊南李皇后宅在后市街韓皇后宅
在將軍橋楊太后宅在漾沙坑壽和謝太后宅在
龍翔宮側全皇后宅在豐禾坊吳王府在後洋街
益王府在新橋秀安僖王府在後洋街漢王府在
西橋莊文太子府在井亭橋沂靖惠王府在清湖
北景獻太子府在鐵冶嶺榮文恭王府在佑聖觀
北周漢國長公主府在左藏庫西張循王府在清
河坊韓蘄王府在前洋街劉鄴王府在明慶寺南
楊和王府在洪福橋賈魏公府在葛嶺成化杭州

府志岳鄂王

府在太學街

宋營屯

建炎以來朝野雜記中興初諸將各總重

兵至紹興二年詔三衙措置營屯次第皆東都衛

兵之遺也

咸淳臨安志殿前司在鳳凰山下馬軍司在保民坊步軍司在鐵冶嶺引見司

在文思院後有等子營班直共二十四班一在保民坊一在豐禾坊一在艮山門內一在梅家橋西

皇城司指揮一在豐樂橋一在輦官營御厨營在

天慶坊翰林司營在京畿第二將南儀鸞司營在

麗正門外內軍器庫營在清波門內修內司營在

孝仁坊綱兵營在平糴倉北八作司營在玉津園

前軍官營在豐禾坊御馬營在嘉會門內外臨安

府兵衛在城九廂城南北廂城東西廂城外東西

南北四壁城內兩縣
界分城外兩縣界分

宋酒庫

呂吉甫杭州監酒廳記天下之酒利杭為

最厚歲入錢殆四十萬管庫之事太小一稟於州

馬

乾道臨安志御酒麴料庫在後市街瞻軍南酒庫在朝天門外有和樂樓瞻軍東酒庫在柴塚

橋之東有太和樓瞻軍北酒庫在鹽橋之東瞻軍西酒庫在三橋之西有豐樂樓瞻軍中酒庫在瀨頭市之北瞻軍南外酒庫在候潮門外瞻軍北外酒庫在江漲橋鎮咸淳臨安志東庫清庫煮庫並在崇新門裏西庫清在橋西煮在湧金門外南庫清在清和坊煮在社壇北庫清在鵝鴨橋煮在祥符橋中庫清在衆樂坊煮在井亭橋南上庫清在睦親坊煮在東青門外南外庫清在清水閘煮在

欽定四庫全書

卷三十九

嘉會門外北外庫清在左家橋煮在江漲橋西溪庫並在九里松天宗庫清在天宗門裏煮在上開東赤山庫清在赤山煮在左軍教場崇新庫並在崇新門外又小庫九碧香庫五分隸各鎮錢塘縣志宋時有麴院在九里松釀官酒之處

宋亭館 都城紀勝都城樟亭驛其地最古且雄據

江山之勝然諸亭館大槩皆由唐制中興以後亦

有增設者

咸淳臨安志樟亭在錢塘縣南五里今為浙江亭苔溪館在餘杭縣南桂芝館

在臨安縣初號東館唐咸通中改名潛溪館芙蓉館鶴山館在於潛長壽館迎恩館朝天館在富陽義亭光華亭海昌亭在鹽官雙溪館在昌化名勝志昔有樟亭可以觀濤今浙江驛是其故址孟

浩然與顏錢塘登樟亭望湖詩百里雷聲震鳴紇
暫輟彈府中聯騎出江上待潮觀照日秋雲迴浮
天渤海寬驚濤來似雪一坐凜生寒蘇軾自昌化
興溪館下步尋溪源至治平寺詩亂山滴翠衣裘
重雙澗響空窗戶搖飽食不嫌溪筍瘦穿林聞覓
野芡苗却愁縣令知游寺尚喜漁人爭渡橋正似
醴泉山下路桑
枝刺眼麥齊腰

漢西部都尉治 漢書地理志會稽郡錢唐西部都

尉治越絕書漢文帝前十六年都尉治錢唐

萬歷杭州

府志會稽西部都尉元狩中徙治錢唐在武林山今靈隱山是也然其定處已不可攷

隋餘杭郡總管府 隋書地理志餘杭郡平陳置杭

州仁壽中置總管府大業初府廢

成化杭州府志圖經謂即唐州

治然世遠

莫可考矣

唐州治 舊唐書地理志隋自餘杭移州理錢塘又

移州於柳浦西貞觀六年自州治南移於今所去

州十一里德宗建中二年賜號鎮海軍

萬歷杭州府志舊州

治凡三一在餘杭舊志云開皇九年置杭州治餘

杭是也一在錢塘舊志云十年移錢塘是也一在

鳳凰山柳浦西舊志云復移柳浦西依山築城即

鳳凰山之右是也今遺址皆不存姚合郡中西閭

詩西園春欲盡芳草徑難分靜語惟幽鳥閒眠獨

使君密林生雨氣古石帶潮紋雖去清秋遠朝朝

見白

雲

宋府治 咸淳臨安志府治舊在鳳凰山之右自唐

為治所本朝至和元年郡守孫沔重建雙門蔡襄

撰記并書刻石

蔡襄雙門記杭於二浙為大州提
夫郡數十而道通四方俗用不一

自錢氏專有吳越治兵蓄財日為戰守朝廷除刺
史以來蓋八十年其風俗治蹟有足稱者要之起
廢弊變繇習斯亦難矣至和元年資政殿學士給
事中孫沔自樞密副使來撫是邦曰此吾鄉也敢
易治之鄆里之稅歲廢中產餘二千家為之籍其
地而出其資市賈謾欺取予不均為之正量衡而
一之富黠倚強餘貧誅利為之索其黨而逐之盜
俱閉藏出沒無常為之盡其根株而去之俗尚浮屠歸

施無節嚴以約束婦人女子潔廉其行寵以簪珥
高年舊德或復諏訪數月之間近遠踴躍迎向公
訓公知衆之已悅也隨所譬喻勉之於善秋八月
語其僚曰諸侯臺門以高為貴蓋以尊天子所命
而示等威也昔錢氏依山阜為治所而雙門置柵
木銅金鐵用為敵備今方內統平吾為守臣於以
遵化而流澤每大號令從官屬陳兵校會州之士
民即門內張次班列而布宣之門圯而地狹又非
禮制豈所以重方面之體乎吾將易而新之即
其說謀之轉運使資以羨錢又詢之於民良家大
姓願以力助於是商其用而裁取之凡埏埴竹木
之材必可其直堅陶蓋梓之工必當其庸十一月
甲戌興作明年五月訖工十有五日壬申合樂讌
飲以落之至於下邑旁郡攜扶老幼聞臨郭郭相
與覲聽指是巍然者曰上之命令由是而出下之
情偽由是而入一有不誠重為門羞吾屬戒焉是

年襄出刺清源州人遮予而言曰我公之為治始者革弊惡人畏其明已而拊養鰥嫠故勅子弟及其治成井市兒童不收落錢田豐海晏人得其職公作雙門我實為之公歸有時我思無窮願為記所作之實而刻之石庶遠不忘初公定邕廣寇還請涖杭上以其遜而不伐召升宥密未幾以直議不能與眾合遂仲前請至則勵精夙夜不以宴息自處其進退忠義之節與所施為若千里之緒固不足書然州人過余再三稱頌殷勤不書無以慰其志

中興駐蹕因為行

宮而徙州治於清波門北

咸淳臨安志臨安府諸廳通判廳北廳南廳東

廳並在府治南都廳在府治西當直司在府治內教授東廳在學之南西廳在學之西僉書判官廳在府治後定安橋西觀察判官廳節度推官廳並在府前近民坊觀察推官廳在食判廳西府院在

府治西左司理院在府治東右司理院在府治
西城南廂廳在嘉會門外北廳在北關門外

元官署 徐一夔官署攷元改府為路而設總管府

以轄之

成化杭州府志總管府至元十四年建路
在今府治金玉總管府至元十七年建在

外橋東向行御史臺在紀家橋今北察院稅課提
舉司四一在城南一在井亭橋一在北郭一在江
漲橋財賦都總管府在佑聖觀東今入武林驛江
淮財賦總管府在前洋街榷茶提舉司在天慶坊
蒙古字學提舉司在鐵冶嶺下省府廣濟庫在癸
辛街洪武初為曹國公宅平準行用庫俗名倒鈔
庫一在朝天門外一在中和橋今鎮撫司一在江
漲橋一在武林門外一在嘉會門外行宣政院今
都使司治江浙儒學提舉司舊在軍將
橋後罷燒鈔庫在戒子橋今入都司

漢錢塘縣舊治 水經注浙江東逕靈隱山山下有

錢塘故縣萬厯錢塘縣志縣治舊在錢塘門裏三

十步後徙於紀家橋華嚴寺基樓鑰為廳記

萬厯杭州

府志舊縣治凡四一在靈隱山麓一在錢湖門外皆漢魏時治也一在錢塘門內今教場地唐治也一在紀家橋華嚴寺故址宋治也今皆不存

謹按錢塘縣治在靈隱山者見於水經注在錢湖門外者考舊志中無之在錢塘門內者自唐厯宋至南渡後始遷於紀家橋不獨唐治並皆郡志之誤

宋錢塘縣尉司 咸淳臨安志在錢塘門外

武林舊事相傳

王子高舊居世稱仙尉內有平湖堂擢桂堂詠物
堂萬歷杭州府志尉司里是其遺址舊署內有清
風軒錢塘縣志宋隆興間茲邑繁麗仁宗覽西湖
圖嘆曰真仙尉也遂建真仙亭蘇軾在杭率賓從
來游遂建英游閣林逋訪謝尉賦秋水芙蓉詩遂
建咏物樓其內有片石周必大賞之遂名奇俊石
又有水

雲亭

吳越錢江縣治 嘉靖仁和縣志梁龍德二年錢氏
割錢塘鹽官地置錢江縣以治錢塘萬歷杭州府
志在武林門梅家橋南

宋仁和縣舊治 宣德仁和縣志縣治舊在武林門

內梅家橋即吳越王所建錢江縣地相傳為吳公子慶忌宅宋太平興國三年改仁和縣令孫廷直徙於招賢坊今興賢坊紹定五年令胡巨卿重修

喬行簡記

互見公署

漢鹽官縣治 嘉靖海寧縣志鹽官漢之舊縣晉宋志縣以鹽官為名唐武德七年省入錢塘貞觀四年復置宋太平興國四年始建於崇儒坊其舊處已不可攷

吳東安郡治 三國吳志黃武五年置東安郡吳錄
曰郡治富春也萬厯杭州府志在富陽縣其定處
今不可攷

唐富陽縣舊治 宣德富陽縣志舊縣署在城東北
唐咸通十年令趙訥建當在古城內與城並建

漢餘杭縣舊治 餘杭縣前志舊在苕溪南今際留
倉卽縣署基也

宋牧馬監 餘杭縣新志在縣南上下湖宋命守臣

梁汝嘉提舉每馬五百匹為一監

唐臨安縣舊治 嘉靖臨安縣志縣治舊在西市元

至正末毀

互見公署臨安縣志宋以前治建在高陸鄉溪東舊碑尚存

唐於潛縣舊治 嘉靖於潛縣志縣治舊在石柱峰

唐武德八年廢潛州復為縣徙治今所

互見公署

唐潛州治 萬厯杭州府志唐武德七年置潛州在

今於潛縣豐谷後鄉城嶺八年廢潛州遂廢

互見公署

唐紫溪縣治 萬厯杭州府志唐垂拱三年置紫溪

縣在潛川鄉尋廢

唐新城縣舊治 萬厯新城縣志縣治舊在縣東南

隅唐長壽中始建今治

宋新城縣簿廳 咸淳臨安志在新城縣城內以杜稜舊宅為之

宋南新縣治 咸淳臨安志淳化六年置其地本嚴州分水縣東境本朝乾德間即其地置南新場熙寧五年廢為鎮隸新城

唐武隆縣治 萬厯杭州府志唐萬歲通天元年易

紫溪縣為武隆縣建治在唐山之南今昌化縣後

是也

錢王故苑 武林舊事錢王故苑以芝生其間捨為

靈芝寺

南果園 武林梵志錢氏南果園在六和塔月輪峰

之傍

瑞萼園 武林舊事本錢王園捨建龍華寶乘院

聚景園 咸淳臨安志孝宗致養北宮拓圃西湖之

東清波門外為南門湧金門外為北門流福坊水

口為水門亭宇皆孝宗御扁

武林舊事有會芳殿瀛春堂攬遠堂芳華

堂花光亭瑤津翠光桂景灝碧涼觀瓊芳彩霞寒
碧柳浪橋學士橋高似孫聚景園詩翠華不向苑
中來可是年年惜露臺水際春
風寒漠漠官梅却傍野梅開

玉津園 咸淳臨安志嘉會門外紹興十七年建北

使至燕射其中淳熙中孝宗數臨幸

宋孝宗玉津園詩一天秋

色破寒烟別築連隄壓巨川欣見歲功成萬寶因
行射禮命羣賢騰騰喜氣隨飛羽嫋嫋淒風入控

弦文武從來資並用
酒餘端有待臣篇

富景園 七修類稿新門外東花園即富景園內有

百花池今園前民家之後尚存大池

嘉靖仁和縣志俗稱東花

園在
城東

梅岡園

桐木園 武林舊事皆北山路御園

錢氏園

武林梵志在昭慶寺側菩提院宋錢惟演

園也

西湖游覽志舊有白蓮綠野等堂碧玉四觀
披瀝等軒南漪迎薰澄心涵碧玉壺雪颺

亭等

玉壺園 武林舊事錢塘門外本劉鄴王園後歸御
前有堂曰明秀

翠芳園 咸淳臨安志在錢湖門外面南屏山舊名

屏山園

董嗣宋翠芳園詩引舊為屏山園開慶初內司展建東至希夷菴直抵雷峰山下水

地西至南新路口水環五花亭外舊有海查一樹
開小紅花在園門外尋亦枯方輿勝覽天竺延祥
寺亦有
屏山園

延祥園 都城紀勝西依孤山為和靖故居與瓊華
園小隱園並三朝臨幸

具美園 夢梁錄楊府園在葛嶺水仙廟西內有飲

綠亭

挹秀園 成化杭州府志在葛嶺水仙廟前為楊駙

馬園

環碧園 咸淳臨安志在豐豫門外柳洲側武林舊

事楊郡王府堂扁皆御書

夢梁錄又
名清暉園

雲洞園 咸淳臨安志楊和王園在錢塘門外古柳

林

武林舊事楊和王府有萬景天全方壺雲洞瀟
碧天機雲錦紫翠間濯纓五色雲玉龍玲瓏金

粟洞天砌臺等處凡用園
丁四十人監園使臣二名

水月園 咸淳臨安志在大佛頭之西紹興中高宗

賜楊和王存中御書水月二字因以為名後復獻

御孝宗賜嗣秀王伯圭內有水月堂前列萬柳

武林

舊事內有瀛燕堂玉林堂皆御書董嗣杲水月園
詩園門當路掩清華喬木靈根裏翠霞地擁樓臺
齊葛嶺天分香影傍林家南朝勳將曾營業外郎
王孫且看花月色水光三十里何人來此泛仙槎

香林園 齊東野語在九里松蘇仲虎尚書園

斑衣園 萬厯靈隱寺志韓世忠之別墅

梅莊園 咸淳臨安志在西馬塍韓蘄王園廣一百

三十餘畝

武林舊事內有堂曰靜樂曰清風及竹軒並高宗御書人有澄淥堂水閣梅坡

芙蓉堆武林野錄蘄王有二園一在德勝橋內有新霽堂有池十餘畝石碑尚存一在梁婆橋有老

息軒釣

魚亭

隱秀園 成化杭州府志在錢塘門外宋劉鄩王園

秀野園 武林舊事在葛嶺路劉鄩王園有四并堂

凝碧園 夢梁錄張府園在孤山路

真珠園 咸淳臨安志在雷峰北歸張循王府

武林舊事

有真珠泉高寒堂杏堂水心亭御港陸游真珠園
雨中作清晨得小雨憑閣意欣然一掃羣兒迹稍
稀游女船烟波蘼山脚濕翠到闌邊坐誦空濛句
余懷玉局仙許斐真珠園詩芭蕉石上題詩字雨
後來看半不全餘濕未勝
濃墨補且攜卮酒到花前

半春園 武林舊事在葛嶺路史衛王府

小隱園 武林舊事在葛嶺路史府園

萬花小隱園 武林舊事在北山路謝府園

快活園 武林舊事在葛嶺路趙氏園

大吳園 小吳園 武林舊事俱在葛嶺路

北園 嘉靖仁和縣志宋福王府園在城北天水院橋傍

新園 成化杭州府志在錢塘門外酒庫側宋秀王府園

擇勝園 咸淳臨安志在錢塘門外九曲墻下秀王府創有御書擇勝愛閒二扁

湖曲園 董嗣杲西湖百咏引甘園在淨慈寺相對齋宮之西舊為內侍甘昇園宋淳祐中名湖曲園

咸淳中屬謝府名新園園倚雷峰有四面堂

武林舊事

甘園曾經游幸有御愛松望湖亭小蓬萊西湖一曲後歸趙觀文又歸謝節使周密甘園詩小小蓬萊在水中乾淳舊賞有遺踪園林幾換東風主留得庭前御愛松

總宜園 夢梁錄張內侍園在西林橋西

董嗣果總宜園詩望

極湖山變幻奇萬千光景自紛披妙分西子爭妍態絕想東坡得句時柳徑曲埋甕率寺花陰直接放生池內官受展亭臺去盡付年華與酒卮

盧園 武林舊事在大麥嶺內侍盧允昇園西湖十

景所謂花港觀魚是也

劉園 武林舊事在柳洲內侍劉公正所居

喬園 武林舊事在小新堤喬幼聞園

裴園 武林舊事在小新堤裴禧園

楊萬里裴園詩
岸岸園亭傍水

濱畫圖飛入水心橫傍人莫
問游何處只憶荷花開處行

梅坡園 董嗣杲西湖百咏引在小麥嶺楊太后宅

園

武林舊事楊郡
王園又名總秀

謝園 武林舊事在北山路謝府園有一碧萬頃堂

錢園 武林舊事在北山路華亭錢府園

南園 蓉塘詩話慶樂園韓平原之南園也有碑石

卧荆棘中猶存古桂百餘

陸游南園記其地為武林之東麓西湖之水涯

於其下堂曰許閒廳曰和容臺曰寒碧門曰藏春閣曰凌風積石為山曰西湖洞天歸耕之莊堂之名則曰夾夢曰豁望曰鮮霞曰於春曰歲寒曰忘機曰照香曰堆錦曰清芬曰紅香亭之名則曰遠塵曰幽翠曰多稼自紹興以來園林相望莫能及南園者武林舊事光宗初賜韓侂冑名南園後復歸御前名慶樂淳祐中賜嗣榮王易名勝景

南湖園 西湖游覽志宋張鑑功父作嘉靖仁和縣

志即今城內南湖稱白洋池者是也張旣以園為

寺今稱張家寺舊碑猶存

張鑑桂隱百果序余所居桂隱堂館橋池諸名

各賦小詩總八十餘首東寺為報上嚴先之地西宅為安身攝幼之所南湖則管領風月北園則從宴賓親亦菴神居植福約齋畫處觀書至於暢懷林泉則又有衆妙峰山介乎前六者之前造物不相負矣東寺有大雄尊閣靜高堂真如軒西宅有叢奎閣德勲堂儒間堂觀樂堂安閒堂瀛壖勝處綺互亭柳堂花院應鉉齋振藻齋宴頤軒尚友軒寶真亭亦菴有法寶千塔如願道場傳長軒寫經寮約齋有泰定軒烟波觀南湖御風橋閭春堂挹蘭亭天鏡亭星槎鷗渚亭汎月閣北園有葺仙繪幅樓桂隱諸處總名今揭樓下清夏堂王照堂蒼寒堂艷香館碧宇水北書院界華精舍撫鶴亭芳草亭味空亭垂雲石攬月橋飛雪橋慈珠洞涉趣門珍林杏花莊安樂泉芙蓉池鵲泉衆妙峰山有

詩禪堂黃寧洞天景白軒文光軒綠畫軒書葉軒
俯窺軒無所要軒長不昧軒摘星軒餐霞軒讀易
軒詠永軒凝薰堂楚珮亭宜雨亭蒲雷亭聽鶯亭
千歲菴恬虛菴憑暉亭美芝亭都微別館水湍橋
漪嵐洞澄霄臺登嘯臺金竹巖隱書巖古雪巖新
巖疊翠亭釣磯菖蒲澗中池珠旒瀑藏丹谷煎茶
磴張鑑玉照堂梅品序淳熙乙巳余得曹氏荒圃
於南湖之濱有古梅數十增種江梅合三百本築
堂以臨之因名曰玉照戴表元牡丹讌集序功甫
以好客聞天下花時必開玉照堂置酒樂客傳為
盛事大德戊戌功甫諸孫國器復尋陸典自天目
致牡丹百餘以三月大享客衣冠之盛咸曰未易
有也

集芳園 咸淳臨安志在葛嶺前臨湖曲後據山岡

原張婉儀園後歸太后殿理宗以賜賈氏改名曰

後樂園

癸辛雜識景定三年詔以集芳園賜賈似道園故思陵舊物古木壽藤積翠四抱仰

不見日架廊壺磴極其營度之巧猶以為未也則
隨地通道抗以石梁飛樓層臺涼亭映館前挹孤
山後據葛嶺兩嶺映帶一水橫陳各隨地勢以構
架焉堂榭之有名者曰蟠翠雪香翠巖倚繡挹露
玉蕊清勝西湖一曲奇勲秋壑遂初容堂初陽精
舍山之坳曰無邊風月見天地心水之濱曰琳瑯
步早船曰歸身通名之曰後樂園第之左瞰湖作
別墅曰光漾閣春雨觀養樂堂嘉生堂生意滿然
生物之府通名之曰養樂園又於西泠之外樹竹
千挺架巨樓臨之曰秋水觀第一春梅塢對船亭
則通謂之水
竹院落焉

水樂洞園 兩湖塵談近烟霞內有水樂洞

癸辛雜識亦理

宗賜賈氏者內有聲在堂介堂愛此留照獨喜玉淵漱石宜晚上下四方之宇並取東坡詩中之語

以為

名

小水樂園 武林舊事福邱園

香水隣園 都城紀勝在葛嶺廖瑩中園又名葯洲

園

武林舊事葛嶺路廖葯洲園內有花香竹色世綵等亭

水邱園 武林舊事在北山路其傍又有呂氏瑤池

園

瓊花園 夢梁錄在褚家塘東

七修類稿瓊花惟揚州有之類聚八仙宦

者陳源取孫枝接於八仙根上至今流傳杭褚家塘瓊花園是也杭志修於咸淳洪武而瓊花園不載偶至褚塘一土地祠見古碑然後知祠名通聖實瓊花園之地即慶忌宅基神乃褚遂良九世孫褚塘之織綾錦此神始之因知二志失考

櫻桃園 咸淳臨安志在瑞石山太廟側

成化杭州府志杭城

舊有兩櫻桃園一在七寶山一在薦橋門外

淳樸園 硤川志紫薇山人沈祐別業在硤石西山

有芙蓉溪柳塘藕花灣

梅園 硤川志在硤石東山峭壁下古梅百餘花時

如雪有飛雪軒

陳氏園 名勝志新城縣石羊山下

是補之同子瞻游陳氏園詩山

園芙蓉開寂寞歲云晚公來無與同念我百里達寒飈吹空林白日下重巘興盡還獨歸挑燈古叢

滿

班荆館 咸淳臨安志在赤岸北使至居之

幸笑館 宣德富陽縣志在縣西門內花竹清幽

東阿山館 宣德富陽縣志在城東倚山環澗地頗

幽勝

超然館 萬厯杭州府志在餘杭縣大滌山晉郭文
隱居於此

通明館 大滌洞天記在洞霄宮宋高宗臨幸至此
几榻咸在

昌黎館 咸淳臨安志在於潛縣峯寧山邑人以令
韓灌為政明允以寓去思又名曠軒

紫薇館 成化杭州府志在於潛縣署

紫溪館 月堤館 晏公類要並在昌化縣城內

褚莊 錢塘縣志在龍井金鍾峰下相傳漢末褚族
舊居於此

養魚莊 武林舊事在柳洲楊郡王府

天竺莊 硤川志在海寧縣硤石山前唐許遠子玟
葬於此

錦南莊 嘉靖臨安縣志錦南為錢武肅王生地有
錦南八勝莊其一也

虛白堂 古蹟考在郡圃唐時建後為錢氏都會堂

乾道臨安志舊圖經云在舊治唐長慶中刺史白

居易有詩刻石堂上堂前有紫薇兩本世傳居易

所植蘇軾有虛白堂紫薇花詩

白居易郡亭詩平旦起視事亭午卧

掩關除親簿領外多在琴書前况有虛白堂坐對
海門山潮來一憑檻賓至一開筵終朝對雲水有
時聽莞絃持此聊過日非忙亦非閒山林多寂寞
朝闕空喧煩惟茲郡閣內器靜得中間羅隱虛白
堂牡丹詩欲詢往事奈無言六十年來此托根香
暖幾飄袁虎扇格高長對孔融尊曾憂叢淺陰難
合且喜春殘色尚存莫背欄
干便相笑與君俱受主人恩

因巖堂 古蹟考在郡圃唐建咸淳臨安志在鳳凰

山舊治今存其名

白居易因巖堂詩箕穎人窮獨
造壺路阻艱何如兼吏隱復得

事蹟攀崑樹羅帶下江雲
貯棟間似移天目石疑
入武丘山清景徒堪賞
皇恩肯放閒懸知興未足

旋被詔

催還

中和堂 咸淳臨安志在鳳凰山舊治本錢王閔禮

堂至和二年郡守孫沔建更名中和建炎三年高

宗臨幸改為偉觀既移改府治仍以名堂嘉定六

年安撫趙時侃再建

李廌中和堂記杭湖浙河雅
為東南一都會民物殷富山

水清美厯唐至五季錢氏所據傳三世閼七紀我
宋受命守吏即王宮為居棟宇宏敞他郡莫及始
錢氏作堂名閼禮至和中威敏孫公沔來守更飭
治之易名中和守居負鳳凰山堂跨山憑高蘇文
忠公嘗謂下瞰海門洞視萬里觀覽之傑可想建
炎初高宗南巡登斯堂賦詩八十言奎章曆藻流
於人間尋易名曰偉觀紹興停鑒浸久因其地祇
行宮而守廨遂徙於清波門之北今所治是也惠
國趙侯被命尹政之明年綱舉目張民情浹和顧
解處閼闔失官守崇密之體侯曰此弗可已也乃
撤廢屋疏朽壞築八十四堵為堂三十七楹獲采
舊名榜曰中和人徒見其堂之成而不聞其費且
勞嘆其室之美而不知其意有所寓余嘗造侯要
余觀焉雖無異時凌虛驚遠瓌異絕特之觀然華
櫨邃宇修欄曲檻崇廣靚深亦足以據雅思而滌
煩襟視故有殊而猶取昔名侯欲存前賢之義而

施於政事者將有所推本侯名時侃字仲和今以
司農卿兼知府事云趙抃中和堂詩老來重守鳳
凰城千里人心未易平樂職古

賢形嘆頌中和終不為虛名

有美堂 名勝志在吳山頂宋嘉祐二年梅摯以龍

圖閣出守仁宗賜以詩有地有湖山美之句因名

其堂歐陽修為記蔡襄書今故址不存而府治後

堂尚仍其名

蘇軾與述古自有美堂乘月夜歸詩
娟娟明月照前軒漱漱星河半隱山

魚鑰未收清夜永鳳簫猶在翠微閣淒風瑟縮經
絃柱香霧淒迷著髻鬟共喜使君能鼓樂萬人爭

看火
城還

清暑堂 乾道臨安志治平三年郡守蔡襄建在州

治之左并撰記及書刻石堂上

蔡襄清暑堂記杭於吳為一大都會

其地傾而屬海又多陂池以故苦濕方春夏時梅雨蒸鬱礎甃皆汗披纖衣覆大厦猶鼻息奄奄不得曠快非有高明之居曷以禦之於是清暑之堂作焉清暑員州廨之左直海門之衝其風遠來灑然薄人日以決事佚而忘勞至者莫不悅之前有江海浩蕩無窮之勝潮濤早暮以時上下奔騰洶湧蔽映日月雷霆鼓駭方輿動搖浮商大舶往來聚散乎其中朝霞夕景不續而彩翠旁走羣山濱山而湖崖隰瀾漫巖岫萃萃爰乎河漢之上蒼烟白雲少頃萬變茂林香草冬榮不凋此所以娛君之視聽也及夫夏日比室煩煥方且披軒閤據高涼放浪於無何翱翔於至極蕭然而白適或賓友環

次鳴管揆瑟醺酒均餌歌呼暝醉此所以憚君之心意也於民乎何有豈不與昔人廬於遠野者異哉余謂之曰唯人之情不得其適則慌然余於是堂也愈吾疾亦於是休吾心焉體康志寧然後究民之不至而教之度民之所有而用之去其所不願就其所便安以得其平於為惠也亦大矣乘其間也燕賓朋接和好是亦為政也遂以其說為清暑堂記

雙檜堂 錢塘縣志在鳳凰山府舊治

泊宅編東坡帥杭一日與

徐璣坐雙檜堂上指檜吟曰二疏辭漢去以兄弟皆補外也璣對曰大老入周來

講易堂 咸淳臨安志在府治愛民堂東紹興十六年安撫張澄建名吏隱堂隆興元年郡守陳輝改

名講易張孝祥書

萬立方講易堂記事莫夥於官學莫達於易游及黃劇之地嘯

咀奧蹟之境能於一時相兼而不相廢者憂憂乎其難哉福唐陳公達振時已覃思潔靜精微之教既筮仕靡勞弗宣聲大彰白天子知之特付衆大之區而牧焉公以一身任之無巨細畢濟其必有得其源者乃於府治之東為講易堂延龍舒易經師王虛中居之帥子弟從焉蓋欲窮其所未盡也虛中嘗著易論四十篇準繫解易二十四卷大率頗以古易正文為主鉤深致遠自得於心又豈如前人屋上架屋之比哉陳公字晦叔名輝虛中名日休

紹定壬辰安撫余天

錫重建

簡樂堂 咸淳臨安志在府治設廳後光宗以青宮

領尹奏疏有訟簡刑清百姓和樂之語後二年郡
守胡與可撫二字名堂且乞御書今府治後堂即

其故址

薛元鼎簡樂堂記輦轂之下雜八方人物
垢簞訟牒抵調糾紛最號為難理故於帥

每難其人乾道辛卯東宮以民事到南衙如太虛
一聲人自怙懼如半天一照毫髮無所逃既而為
堂於設廳之背時出而從容其間若無事可理而
畿甸熙熙盡在春風和氣中矣蓋嘗奏疏自期有
訟簡刑清百姓和樂語不二年既效又二年胡與
可承乏府事迺采其語以名堂仍請天書而榜之
示將來法馬元鼎執經備數宮僚宜為紀其實且
銘之曰浩穰繁劇情偽百出雖有智者莫窮目力
惟是此心應以虛一鏡照妍媸繩分曲直物晦必
明事虛必實姦伏自斲不在發擿事往心閒庭空

人寂故雖至勞而將至逸允矣前星行之昨日至
今塗荃懽聲洋溢惟閭閻則樂此理不易貽揭茲堂
以垂
千億

承化堂 咸淳臨安志在府治愛民堂後嘉定間安撫袁韶建

三桂堂 咸淳臨安志在府治承化堂側

恕堂 咸淳臨安志在府治清暑堂前紹定間安撫余天錫建

松檜堂 咸淳臨安志在府治中和堂西淳祐間安

撫趙與憲建

愛民堂 咸淳臨安志在府治清暑堂東淳祐九年
安撫趙與憲建明年理宗御書愛民篇因以名堂
仍請御書為扁

景蘇堂 咸淳臨安志在府治簡樂堂西景定三年
安撫魏克愚建

萬應杭州府志以蘇
文忠嘗守郡故也

見廉堂 咸淳臨安志在府治中和堂前舊為七間
堂咸淳五年安撫潛說友撤而新之樓其上最為

高聳面南諸峰若拱若揖堂成適有足見廉能之

褒因取為名

馮夢得見廉堂記聖君以恭儉化天下歲下詔書廣宣厥道越郡國吏罔

不用勸思所以風厲之動於耳目而周乎區蓋之間夫豈徒哉惟京尹卓犖諸夏知遠之近知風之自據會要以觀方來以為莫先於此而簡修之具行焉廼咸淳六年戶部侍郎潛君守京兆至是二年矣政修人和百為克開每歲終攷其成無一人之獄計所裁縮代九縣輸四五等戶租一年椿釀庫本為緡凡五百萬此其大較也高第轉聞璽書數下嘉其廉平會斯堂落成白於朝因具廉能見名曰見廉將以習天下之為郡國者抑自今至於後日坐斯堂者亦將以存其見而使相為君子也夫灑掃庭內維民之章華袞一字其嚴矣哉烏乎得見有常者斯可矣嬰以廉恥故人矜節行聖賢

揭厲人心之道槩如此夫廉非小善也漢時文翁黃霸朱邑尹翁歸之屬居官可紀壹是為本史稱良吏凜凜甚盛故嘗論之平仲不受邑以足欲非惡富也是幅利也義也子文不勤民以自封非厭取也是庇民也仁也懷仁義以事君而廉在其中矣是皆無所為而為之也烏乎推是心也千載而下猶將見之潛君名說友字君高括蒼人

宣化堂 劉基杭州路重修府治記杭為東南大郡

寶珂公為總管理而新之其視事之堂即其舊名

曰宣化

秋香堂 乾道臨安志在漕臺舊治轉運使劉既濟

建

節愛堂 咸淳臨安志在兩浙轉運司寶祐初運使

王克仁建

周咨堂 振襟堂 寬民堂 咸淳臨安志在兩浙
轉運司並淳祐間運副魏峻建

繡春堂 公生明堂 咸淳臨安志在兩浙轉運司
並景定間運副魏克愚建

仁惠堂 咸淳臨安志在兩浙轉運司紹定初運副

陳宗仁建

浩春堂 風月堂 咸淳臨安志並在通判廳

芙蓉堂 咸淳臨安志在僉書判官廳咸淳四年安撫潛說友重建

畫簾堂 咸淳臨安志在錢塘縣舊治

無倦堂 倪思無倦堂記宋淳熙十一年陳鞏宰仁
和葺縣舍北向數椽為齋名曰無倦

安敬堂 嘉靖仁和縣志在縣治宋嘉泰二年令胡

巨卿建

湖山堂 咸淳臨安志在蘇公堤第二橋西咸淳三
年安撫洪燾創棟宇雄傑面勢端闊罔巒層疊水
光滉漾四浮圖列四隅前則雷峰保叔後則南北
二高其後芙蕖菰蒲蔚然相扶後三年安撫潛說
友增建水閣卓然為西湖最勝

柏堂 蘇軾孤山二詠引孤山有陳時柏二株其一
為人所薪山下老人自兒時已見其枯矣然堅悍

如金石愈於未枯者僧志詮作堂其側名曰柏堂

與白公居易竹閣相連屬余作二詩記之

錢塘縣志
在西泠橋

東坡所云九朝三

見太平年是也

隱居堂 晏公類要後漢陸瑋隱居靈隱山學易圖

淮南王及九師之像又名九師堂

思真堂 陸羽二寺記許邁字遠遊建在靈隱山

錢塘

縣志今靈隱山有許由舊蹟是因遠遊而誤也其見於陸羽記者可證

丹竈堂 陸羽二寺記葛洪煉丹之所

德生堂 咸淳臨安志紹興間請以西湖為放生池

慶元四年安撫趙師異創德生堂於石函橋西內

翰高文虎為記又作二亭於傍曰飛泳曰枕山

董嗣

杲德生堂詩引德生堂

飛泳亭二扁皆御書

涼堂 四朝聞見錄孤山涼堂西湖奇絕處也植梅

數百株堂中素壁四堵蕭照畫

鑑堂 咸淳臨安志在孤山

南漪堂 董嗣杲西湖百詠引在錢塘門外菩提寺

西東坡咏南漪堂杜鵑花詩即此後為玉壺園

玉蓮堂 咸淳臨安志在錢塘門外菩提寺南景定

二年安撫馬光祖建三年安撫魏克愚奉玉蓮堂

奎扁揭於此

武林舊事原名一清堂萬歷杭州府志湖中競渡以此為奪標之所董嗣

杲玉蓮堂詩引玉蓮舊在郡治教場之南景定三年移於錢塘門外扁曰一清後以堂外多種白蓮

復揭玉蓮
舊賜額

閱古堂 四朝聞見錄在太廟側本韓魏公舊名侂

冑因名青衣泉曰閱古泉為流觴曲水有桃坡十

二級雲巖之奇者曰雲岫

湖堂 乾道臨安志在豐豫門外堂前有集賢亭武

林舊事舊在聳翠樓側

薛昂題湖堂詩一段風烟不可闕出門滿日是湖山

昔人華厦今何在此日漁舟任自閒鳳觀簇新霄漢上龍洲依舊水雲間歸來丘壑多幽趣願與諸

賢約

往還

冰壑書堂 武林舊事樞密金淵號冰壑嘗作書堂

積慶永清二山在後平鼎山在左湖山在前乃南

北二峰之中最高處也理宗御書積慶山怡顏藏

書農圃以賜之

翠樾堂 見楊蟠西湖百詠

西嶺草堂 見楊蟠西湖百詠

雪江書堂 武林舊事在蘇公堤第四橋胡賢良旣

所居

曲江草堂 錢塘縣志在五雲山下元錢惟善故居

易恒題曲江草堂詩浣花去後鍾山遠今見風流
在曲江八十儀型猶有幾三千詞賦總無雙屋頭
秋老凌霜樹竹下春閒聽雨窗好
向西村尋舊隱月輪峰側響飛瀧

依光堂 董嗣杲西湖百詠引本錢氏靈芝崇福寺

紹興中阜陵臨幸因創堂扁曰依光

萬歷杭州府志宋進士題

名之地

賀蘭堂 袁桷賀蘭堂記靈武李公居錢塘三十年
築其弟之堂而名之曰賀蘭志不忘本也

樂壽堂 袁桷樂壽堂詩序葛嶺有堂顏曰樂壽容
齋李公習靜之所

山舟堂 錢塘縣志在城南天龍寺內元貫酸齋雲

石嘗讀書於此山舟二字雲石書

愛蓮堂 戴表元愛蓮堂記相臺唐伯榮居錢塘東
圃有池植蓮其中生一莖雙花好事者繪為畫圖
於是取周元公語名其並池之堂曰愛蓮

快雪堂 萬厯錢塘縣志在孤山四賢祠傍馮夢禎
之別墅

清愛堂 嘉靖海寧縣志在舊縣治內

郭知運清愛堂詩

前竹色佳留烟帶月翠橫斜日長
吏散庭空後風景蕭蕭對淪茶

綠遶堂

嘉靖海寧縣志在縣後圃

陳申重修綠遶堂記予至海昌

之二年既葺故亭而新之榜曰仰高矣直亭而南有堂歸然上漏旁穿不知廢於何時詢之里人張似之云綠遶之名得於橫浦張先生蓋取王荊公一水篴田之句風在臆者使知農田為務特加修正以著遺範移植醪醱於後即支木為架數條舒蔓其下可坐十人餘則盡循其故春夏之交雲隴收黃雪縑堆白稻田桑野蔥舊彌望主人休其心於觀相彈琴不下堂見穎粟堅好之實邑民相與飽食而嬉里胥足不及門賦輸告辦吏塞責矣若乃素月流天蕙風飄香合杯促坐酣歌醉舞則非先生所以命亭之意予恐有耽斯堂之勝而以民事為緩者故併書以記

晞梅堂

嘉靖海寧縣志在縣尉廨

一經堂 海寧縣志元朱圭建

貢師秦一經堂記一
經堂者海昌朱肅齋

氏名之以訓其子參政周公伯溫所書也肅齋之
子鏊從余游請余為記余謂六經盡載聖人之道
何獨取一經豈不以漢韋賢有一經教子之說耶
不然將先明一經而他經從可明也夫經之目有
六為說不同而道則未嘗不貫於一三五以降歷
世益遠然其垂訓立教不過數十言而止至我大
子贊序則正更加述作可謂極盛實亦不過數百
卷而止耳以數百卷之書明數十言之旨簡易精
潔如天地運行如日月照臨其道未嘗不廓然而
公燦然而明也及秦漢諸儒各出已見務為專門
議論詆訾於是簡冊之多棟充牛汗既已湮塞聖
道分裂經旨不可究極近世海內之士疲精竭力
靡然向風恣為新奇之言巧飾頌辭之見烏乎大
道之晦一至於此向非周程張邵朱呂數君子者

出孰能發微言於既昧之中尋墜緒於不傳之後
乎今之學士大夫執其全書因以潛觀默識旁通
四邇則亦幸矣然有讀書萬卷而實無一言之得
者有探一言之要而終身守之不失者其故何也
道之明與不明而已鉅也文公諸孫其庶幾有
得於此歟不然雖日誦六經無益况一經哉

合香堂 富陽縣志在縣圃

癸辛祿識先君宰富陽
闕縣圃鑿池建堂適有

雙蓮之瑞因名合香堂取
古詩風合雨花香之句

瑞蓮堂 萬厯杭州府志餘杭縣治內之東因白蓮

花池故名

元祐學堂 咸淳臨安志在臨安縣治景定三年令

家之興建

九龍堂 萬厯杭州府志在臨安縣廳東北

袞繡堂 嘉靖於潛縣志宋隆興初令葉衡於廳之

東偏築堂為退思之所慶元中衡入相令邵文炳

名其堂曰袞繡嘉泰二年縣治火此堂獨存

邵文炳

繡堂記潛治山溪幽深其俗險而質其民勁而武故常難服而易化苟有以應所儀則相與愛敬而不忘金華葉公之來察里閭情偽銳於植立廳事東偏有堂深靜而虛明為退思之所融融萬理出而施之所以洗濯而鼓舞其民者蒸蒸無復苟且之意邑人誇詡以為昔所未有後公來者欲踐武

增光而未能也。衮衣繡裳室通人遠之歎。及茲未
泯。不獨慰父老思。懸而青木映帶軒廡。欣榮亦發
越而形見焉。登茲堂而遐觀。心存古人。夢接千載。
能使民安。其生物得其所。於以寫鳴絃之遺音。歌
衮繡之聲詩。
斯無愧矣。

景覽堂 萬厯杭州府志在於潛縣治簿廳左

梅隱堂 高雅堂 嘉靖於潛縣志並在縣治內

深清堂 萬厯杭州府志在新城縣治內。取蘇文忠

亂山深處長官清之句

滴翠堂 咸淳臨安志在昌化縣治面對羣山乾道

八年令卞園創

朝陽堂 萬厯杭州府志在昌化縣舊治宋縣令卞

園建

三瑞堂 萬厯杭州府志在昌化舊縣後宋景定中

邑西鳳凰山產瑞麥及諸山產嘉禾嘉粟縣令劉

宗憲表獻於朝理宗作詩紀之因作此堂而勒御

書於上

清白堂 萬厯杭州府志在三瑞堂左宋咸淳中縣

令李長孺建

瑞應堂 萬厯杭州府志在昌化舊縣簿廳後宋建

又有應宿堂元建

靜觀堂 成化杭州府志在昌化縣南覽溪蕭源章

氏山莊宋章詡建

章詡首夏靜觀堂書懷詩杖策下層巔來憩雲外莊簷低繞顧

垣澹泊在一堂山高戶牖虛水清長夏涼翳翳動林影漱漱浮溪光心遠與世隔獨有文史香汲井資煦嗽蒔藥助體強園中橘為奴治內美堪棠蒼官青不老籬下明秋芳陶情在庶物養性歸琴觴矯首起遐觀此中有濠梁

書錦堂 昌化縣志在覽川宋處士章運之建

損齋 咸淳臨安志紹興二十八年十一月高宗出

御札損齋記石本以賜羣臣諭之曰朕宮中嘗闕

一室名為損齋置經史其中朝夕燕坐嘗作記以

自警

宋高宗損齋記嘗謂當天下之正位撫域中之萬微苟無以立其獨則多見弊精神疲意

志而不知止廣宴遊事不急膠膠擾擾莫收其放心顧能回光抑損之道豈不較然有感於斯且漢唐之君樂道為切而未燭玄覽武帝以雄心非用損以持盈也明皇以侈心非知損以守位也推原本指俱失滿戒茲鑒往事夕惕以思凡追逐時好一切長物率屏去不復經意凡案間但有書史商

確古今盡撤無益示不貴之化其於蕩心侈目者罔不掃除清心寡欲省緣薄費者奉以周內焉不則染毫弄翰真草自如濃淡斜行茂密惟意第於筆硯間有未能忘情似賢乎已夫乾坤之道易簡也易簡則天地之理得矣傳曰器用不作車服從給信斯言哉宵旰餘暇乃闢殿廬之側明窗靜戶為游息之所欣然撫前說榜曰損齋朝夕清燕視以自警庶幾損德之修自奉養有節式稽於訓

易安齋 四朝聞見錄光堯御書於郊壇易安齋曰謁款泰壇因過易安齋愛其去城不遠巖石幽邃得天成之趣為題梅巖詩

高齋避暑錄話在州宅內清暑堂之後舊踞城闔

橫為屋五間下瞰虛白雖不甚高大而超出州宅

之上故為州者多居之

嚴維高齋詩詩家九日憐
芳菊遲客高齋對浙江漁

浦浪花搖素壁西陵樹色入秋宵木奴向熟懸金
實桑落新箇瀉玉缸四子醉時多講德笑論黃霸

屈為

邦

隱秀齋 名勝志在通判北廳宋蘇軾書紹興四年

始刻石趙令時書其下

莫能名齋 咸淳臨安志在寶蓮山慈湖楊文元公

創萬歷杭州府志在浙西安撫司幹辦公事廳內

楊簡莫能名齋記四明楊簡為浙西撫屬淳熙十一年八月朔既領事而宅僦隘陋無晏息之所偶得在官僧屋於寶蓮山之顛帥君為更其居又使簡惟意規摹之乃創書室於高爽之地且曰是不可以不命名簡思所以名之東望大江巨濤際天越山對揖袞袞如畫風帆飛鳥夕陽烟蕪朝暮晦明變態百出於是間名之乎如此命名不惟游逸沉溺要不可謂真識江山西望錢湖玉潔如鏡茂林奇峰樓觀輝目烟靄翠蒙模寫不可於是間名之乎如此命名不惟游逸沉溺要不可謂真識湖山之乎而即諸本真歛其放情落其外慕窮理密之幽微探玄珠之杳冥不則事理兩融曲暢旁通百川會同歸宿乎中又不則悠然無事惟意所之無所造為樂亦熙熙於是間名之乎如此命名不惟游逸沉溺俱不可為實識本真周恩天下古今名言無一可以稱此又豈惟簡莫能名正恐盡明智

絕識之士竭意悉慮終莫能名於是榜曰莫能名齋然則終不可得而名之乎曰有能名之者是齋之南高松扶疎微風過之蕭然有聲是能名吾齋矣是齋之東洪濤駕風怒號翻空是能名吾齋矣是齋之西湖光翠迷花飛鳥啼是能名吾齋矣是齋之北塵紆其麓鱗比費屋人物往復啾啾碌碌是能名吾齋矣有嘲曰既莫能名又曰是能名何其立說之無常簡曰常淳熙乙巳仲春月記

西齋

許渾有遊錢塘青山李隱居西齋詩

又作李耶

雪齋

武林舊事在方家峪西林法慧寺武林雜記

宋慶歷中僧法言作激水為池疊石為山灑粉樹

杪狀若飛雪蘇軾題曰雪齋秦觀為記

學古齋

戴表元學古齋記州城之西西秦張仲實

居之巴西鄧善之與仲實交分一室共居題曰學

古齋

浩然齋 蓉塘詩話周密公謹晚年寓居錢塘癸辛

街作癸辛雜識

趙孟頫寄周公謹錢塘寓居詩三年漫仕尚書郎夢寐無時不故鄉

翰輿錢塘周老子

浩然齋裏坐焚香

困學齋

戴表元困學齋記鮮于伯機為杭三司史

掾方營一室名曰困學之齋

選德齋 萬歷杭州府志在海寧縣西廳之後

思政齋 嘉靖於潛縣志在縣治宋寶慶中令方熙重建依山占勝為他邑之冠

石林軒 乾道臨安志在舊府治後至和中郡守孫
沔建初號燕思閣又取臨安淨土寺立石七株置
之閣前蒼然奇怪號七賢石元祐中郡守蒲宗孟
改名石林軒

聽雨軒 咸淳臨安志在府治中和堂後景定五年

安撫劉良貴建取東坡詩中和堂後石楠樹與君
對床聽夜雨之句為名

清明平軒 咸淳臨安志在府治簡樂堂後咸淳五
年安撫潛說友揭諸便坐

樂清軒 徐一夔樂清軒記姑孰鄭君芳桂擢知錢
塘治其公署之東偏為退食之所顏之曰樂清

勤清軒 萬厯杭州府志在舊錢塘縣治

南屏軒 四朝間見錄小南屏山面對南屏軒

此君軒 董嗣杲西湖百詠引在壽星寺西廊寺門
坡下又有亭名一擊軒基不得而攷

一笑軒 萬厯靈隱寺志在靈鷲

借竹軒 錢塘縣志在吳山舊瑞隆院傍宋秦觀曾
宿軒中夢天女以維摩像求贊

學士軒 成化杭州府志在保叔塔右元集賢學士
黃潛遊杭僧炬為築此軒舍之

蘭芳軒 貝瓊蘭芳軒記永嘉李至剛僑居錢塘城

東闢室樹蘭其前顏曰蘭芳

君子軒 戴表元張園玩月詩序元大德戊戌八月
合讌於君子軒之圃圃主清河張瑛仲實其族子
焞烈客剡源戴表元錢塘屠約龍泉陳康祖會稽
王潤之戴錫嘉興顧文琛並集焉

醉墨軒 徐一夔醉墨軒碣錢塘俞和子中所居元
至正時朝廷修宋遼金三史行文浙江行省繕寫
鏤版屬子中校正

欽定四庫全書

浙江通志
卷三十九

萬玉軒 西湖游覽志在石人嶺後時思薦福寺側
地近西溪最多古梅游河渚者必至焉

友梅軒 劉基友梅軒記臯亭之山有隱者以友梅
字其軒環其居皆梅也隱者王姓景名

挺立軒 咸淳臨安志鹽官縣丞廳

環綠軒 嘉靖海寧縣志在長安鎮環水宋濂為鎮
人游氏賦云水竹佳致詩書雅懷樂只君子悠哉
悠哉

棟花軒 舊浙江通志去海寧縣五十里環溪多棟
因以名溪宋安化王之喬構數椽於上明青田劉
基署曰棟花軒

雙檜軒 海寧縣志在悟空塔前蘇文忠公有雙檜
詩又有問牛軒亦在塔前鹽官令張昱有詩

掬月軒 萬厯杭州府志在富陽縣後堂

天趣軒 萬厯杭州府志在餘杭縣南湖弘治間尚
書鄒幹重建

有秋軒 嘉靖臨安縣志在縣廨西北宋景定三年
令家之吳建

深明軒 咸淳臨安志在於潛縣治寶慶丁亥令方
熙重建

此君軒 嘉靖於潛縣志舊名綠筠東坡行縣題詩
後徙於縣治宋寶慶初易名此君在今儒學後軒

洪咨夔此君軒記軒舊隸寂照精舍東坡倅杭行
縣為賦不可居無竹之詩隆興初徙於縣治袁緒
堂之東開禧間嘗重建寶慶初避上嫌名桐江方
侯熙易名此君仍用坡詩取晉王徽之語也蘇軾

於潛僧綠筠軒詩可使食無肉不可居無竹無肉
令人瘦無竹令人俗人瘦尚可肥士俗不可醫傍
人笑此言似高還似癡若對此

君仍大嚼世間那有揚州鶴

日哦軒

嘉靖於潛縣志在縣丞廳宋建

姜機日哦軒詩高軒

多暇日安寐獨怡神風俗無令古雲山自主賓灘
平分燕尾松老半龍鱗徙倚清陰下吟成愧昔人

綠筠軒

輿地紀勝在昌化縣治

掬雲軒

銜翠軒

夕霏軒

昌化縣志並在縣治

俱宋令十園建

中和軒 萬厯杭州府志在昌化縣後元建

桃竹軒 咸淳臨安志在昌化縣參寥子道潛有題
王悅道桃竹軒詩

鑑軒 萬厯杭州府志在昌化縣

浙江通志卷三十九

欽定四庫全書

浙江通志卷四十

古蹟二

杭州府下

忘筌亭 古蹟考在郡圃內唐時建咸淳臨安志在

鳳凰山舊治今存其名

白居易忘筌亭詩翠巘公門對朱軒野徑連只開新

戶牖不改舊風烟虛室閒生白高情淡入玄酒客同坐勸詩就滿城傳自笑滄江畔遙思絳帳前亭

臺隨事有爭

敢比忘筌

西亭 錢起有九日宴浙江西亭詩

又作嚴維

錢塘府亭 羅隱有錢塘府亭詩為錢武肅王作

碧波亭 晏公類要在子城北門外吳越備史天福

三年十二月王大閱馬步軍樓艣於碧波亭咸淳

臨安志亭臨水面濶數丈元豐四年郡守張詵重

建

南園巽亭 乾道臨安志慶厯三年郡守蔣堂於舊

治之東南建巽亭以對江山之勝崇寧三年蔣之

奇作詩紀其事

蘇舜欽南園異亭詩公自登臨闌
草萊赫然危締壓崔嵬涼翻簾幙

潮聲過清入琴尊雨氣來晴肯登臨何處好平生
懷抱此中開東南地本多幽勝此向東南特壯哉

望越亭

乾道臨安志在舊治後慶厯中郡守蔣堂

建政和元年郡守張閣遷巽亭於此

曲水亭

咸淳臨安志在鳳凰山舊治治平中守沈

邁建

清風亭

乾道臨安志在中和堂側直望海門

鳳凰亭

咸淳臨安志在府治南通判北廳

隆禮亭 乾道臨安志祥符舊經云在郡城錢塘舊

治之南到縣一十三里

敦禮亭 乾道臨安志祥符舊經云在郡城錢塘舊

治之南到縣一十二里

崇禮亭 乾道臨安志祥符舊經云在郡城錢塘舊

治之南到縣一十一里

安濟亭 乾道臨安志在錢塘舊治南到縣二十里

浙江亭 乾道臨安志在錢塘舊治南到縣一十五

里

集賢亭

乾道臨安志在豐豫門外湖堂前

潺湲亭

乾道臨安志古稱阿閃佛塔亭旁有溝牋

引湖水以注相國井遂名潺湲亭

通遠亭

乾道臨安志祥符舊經云在錢塘縣舊治

北到縣四里

古泉亭

太平寰宇記錢塘古泉亭有紫水如霞

夢謝亭

晏公類要靈隱山畔舊有夢謝亭謝靈運

父居會稽因不宜子息乃於錢塘杜明師舍寄養

師夜夢東南有賢人來訪及曉靈運至故作夢謝

亭

名勝志一名客兒亭虛元輔詩絕頂客兒亭是也成化杭州府志謝履亭在上天竺

南亭 萬厯杭州府志在郡城東南隅唐建

杜牧南亭記趙

郡李子烈播立朝名人也自尚書比部郎中出為錢塘錢塘於江南繁大雅亞吳郡子烈少遊其地

委曲知其俗蠹人者別削根節斷其脉絡人隨化之三策于丞相云溝壤民居不一錐錮敗侵不休

詔與錢二十萬築長堤人益安喜子烈曰吳越古今多文士來吾郡遊登樓倚軒莫不飄然而增思

吾郡之江山甲於天下信然也乃作南亭於城東南隅江平入天越峯如髻越樹如髮半夜酒餘殷

殷浪聲起於月外東閩兩越宦遊善地也予知百
數十年後登南亭者念仁聖天子之神功美子烈
之旨跡觀南亭十萬狀吟不辭已四時十萬狀吟
不能去作為歌詩次之於後不知幾千百人矣姚
合題杭州郡齋南亭詩舊隱即雲林思歸日日深
如今來此地無復有前心古石生靈草長松栖異
禽暮潮簷下過
滅浪濕衣襟

冷泉亭 方輿勝覽在飛來峰下唐刺史元稹建勝名

志相傳冷泉二字白居易書亭字蘇軾續書白居易
易冷泉亭記東南山水餘杭郡為最就郡言靈隱
寺為尤由寺觀冷泉亭為甲亭在山下水中央寺
西南隅高不倍尋廣不累丈而撮奇得要地搜勝
聚物無遁形春之日吾愛其草薰薰木欣欣可以
導和納粹暢人血氣夏之夜吾愛其泉淙淙風冷

欽定四庫全書

浙江通志
卷四十

冷可以鑄煩析醒起人心情山樹為蓋巖石為屏
雲從棟生水與階平坐而翫之者可濯足於牀下
卧而狎之者可垂釣於枕上矧又潺湲潔澈粹冷
柔滑若俗士若道人眼耳之塵心舌之垢不待盥
漱見輒除去潛利陰益可勝言哉斯所以最餘杭
而甲靈隱也杭自郡城抵四封叢山複湖易為形
勝先是領郡者有相里君造虛白亭有韓僕射臯
作候仙亭有裴庶子常棣作觀風亭有盧給事元
輔作見山亭及右司郎中河南元稹最後作此亭
於是五亭相望如指之列可謂佳境殫矣能事畢
矣後來者雖有敏心巧目無所加焉故吾繼之述
而不作長慶三年記梅詞冷泉亭詩古竇鳴幽泉
蒼崖結虛宇六月期客游披襟苦徂暑開窻弄清
淺吹鬢疑風雨不見白使君烟蘿為誰語毛友冷
泉亭詩并序昔人以為冷泉未極其妙因加小亭
其上然冷然水光潄然山翠以故去者過半予以

謂不必加工但去其尤贅者斯善也如明鏡中而加綉畫非不美好所以為清明者逝矣拂拭舊翳舊觀復還可也面山取勢俯山中亭外安亭自蔽蒙眼界已通無礙物胷中陡覺有真空試尋櫓響驚時異却聽猿聲與舊同萬事須臾成轉易我來閱世一初終曹旣明冷泉亭詩朱簷日轉軒窗冷碧峰雲低草樹香山影倒沉波底月夜閑相對濕寒光張履信冷泉亭詩水石一闌干僧歸四山靜

搗琴譜澗泉月浸夜深冷

候仙亭 咸淳臨安志唐守韓臯建久廢安撫趙與

憲更造

白居易候仙亭詩蹇步垂朱綬華纓映白鬚何因駐衰老只且有歡娛酒興還應在

詩情可便無登山與臨水猶未要人扶沈亞之題候仙亭詩新創仙亭覆石壇雕闌峻宇入雲端嶺

北嘯猿高枕聽湖
南山色捲簾看

虛白亭 咸淳臨安志唐守相里君造

見山亭 咸淳臨安志唐守盧給事元輔建

錢塘縣志在靈

隱寺後一
名巢雲

觀風亭 咸淳臨安志在冷泉亭側唐庶子裴常棣

建

武林舊事四亭俱廢惟冷泉存

壑雷亭 咸淳臨安志在冷泉亭側宋淳祐中安撫

趙與憲創

袁君亭 萬厯靈隱寺志後人思慕唐刺史袁仁敬
建

紫薇亭 咸淳臨安志郡守紫薇舍人唐詢暇日至
靈隱山顧訪勝槩後建亭於此因名

翠微亭 萬厯靈隱寺志在飛來峰半韓世忠建韓
公因岳飛登池州翠微亭詩有特地尋芳上翠微
之句故以名亭亦隱痛之也

曲水亭 董嗣杲西湖百詠引曲水亭在下竺寺前

一曰流杯亭有水臺盤在亭心宋淳祐間重建

梅詢

曲水亭詩鶴髮山中人流水鑿幽石如凭青玉案
分遞白雲液泠泠滅鼎俎瑟瑟穿瑤席醉坐三伏

中煩襟
自消釋

月桂亭 古蹟考在月桂峰下

望海亭 萬厯靈隱寺志在北高峰頂

石橋亭 咸淳臨安志在武林山中路近翻經臺

介亭 咸淳臨安志在鳳凰山對排衙石熙寧中郡

守祖無擇作天風泠然有縹緲憑虛之意

蘇軾登
介亭餞

楊次公詩簾輿西出登山門喜與我友尋仙村丹
青明滅風篁嶺環珮空響桃花源前朝欲上已蠟
履黑雲白雨如傾盆今晨積霧捲十里豈畏觸熱
生病根在家頭陀無為子久與青山為弟昆孤峯
盡處亦何有西湖鏡天江抹坤臨高揮手謝好住
清風萬壑傳其言風回響答君聽取我亦到處隨
軒君

聽泉亭 武林梵志近法相寺里許沿塢而上蘇軾

題榜

忠實亭 武林梵志在介亭傍宋高宗御書

橘園亭 嘉靖仁和縣志在豐樂橋北傍水宋高宗

創亭其上其地多美橘至今稱橘園亭乾道臨安志在鹽橋之南乾道五年郡守周淙重修

馭舟亭 乾道臨安志在鹽橋之北

紅亭 咸淳臨安志外沙河自竹車門北去繞城東過紅亭稅務

武林亭 四朝聞見錄太乙宮後有小土阜曰虎林

山亦稱武林山上有亭曰武林環以花竹

咸淳臨安志在

城內虎林山
高士堂後

過溪亭 施註蘇詩辨才法師退居龍井東坡守杭
作亭風篁嶺上名過溪因東坡詣師師送至嶺上
亦曰二老亭

垂雲亭 蘇軾有登垂雲亭飲參寥泉詩

暢亭 淪俗亭 咸淳臨安志俱在棲霞洞外

宜對亭 名勝志在九里松葉紹翁書

如此江山亭 成化杭州府志在吳山梓潼廟

香月亭 清新亭 挹翠亭 香蓮亭 成化杭州

府志並在孤山

舒嘯亭 武林梵志在烟霞洞傍

秀江亭 武林梵志在開化寺傍

毛萬齡登秀江亭望海詩層樓落日

海門開千里濤聲一瞬來我欲憑闌看起處晴江白雪滿瑤臺

問水亭 玉蓮亭 萬厯錢塘縣志俱在湧金門外

錢塘縣志問水亭明孫隆建游人歸憩湖舟皆集於下張遂辰問水亭歸船詩銀燭碧籠紗歸船喧

幾家仍呼小蘭葉月下理琵琶

柳洲亭 錢塘縣志即豐樂樓舊址明嘉靖間郡守

陳仕賢建初名柳洲別館

廣羣芳譜南渡後自湧金至錢塘沿城五里徧

柳垂

望湖亭 成化杭州府志在寶石峰之陽

萬歷杭州府志唐時

在孤山之北宋時徙寶石峰國初復故址四面玲瓏夏月最快

種德亭

蘇軾種德亭詩序處士王復家於錢塘為

人多技能而醫尤精築室候潮門外作亭榭以與士大夫遊人徒知其接花藝果之勤而不知其所種者德也乃以名其亭

湖心亭 萬厯杭州府志在西湖之中舊有湖心寺

寺外三塔鼎峙弘治中寺與塔俱燬嘉靖中知府

孫孟尋遺址建亭萬厯四年按察僉事徐廷祿重

建萬厯錢塘縣志湖心寺舊有三塔其中塔南塔

久廢乃即北塔基建亭於上名湖心亭

西湖遊覽志萬厯四

年僉事姑蘇徐廷祿大叅海虞王竺錢塘尹西蜀姜召同建亭額有太虛一點宛在水中中央之題同

禮孫隆重建四礎上植桃柳改曰喜清閣

國朝康熙三十八年

聖祖仁皇帝省方巡幸

御書靜觀萬類四字額又

御製湖心亭詩二首

恭紀
首卷

放鶴亭 萬厯杭州府志在孤山北元至元間儒學
提舉余謙葺林處士墓構梅亭於下郡人陳子安
構鶴亭配之並廢明嘉靖中錢塘知縣王鈺建茲
亭以續舊

國朝康熙三十四年

聖祖仁皇帝命刑部員外郎宋駿業督工重建

御書放鶴二字扁於亭楣又書舞鶴賦刻石立亭上

歲寒亭 遂昌雜錄孤山之陰一亭在高阜上曰歲

寒繚亭皆古梅

喬木亭 戴表元喬木亭記亭在清河張君燕居之

東其先世忠烈王以功開國於循而置邸於杭子

孫五世所居邸之坊至今稱清河馬

梅亭 四朝聞見錄陳讜題吳山三茅觀梅亭詩有

云竹密不知雲欲雨山高盡見水朝宗

駕霄亭 齊東野語張功甫鎡於南湖園作駕霄亭
於四古松間以鐵絙懸之半空而羈之松身梯登
之真有挾飛仙之意

留雲亭 武林梵志在南湖張家寺內宋建其地今
為賽西湖

江湖一覽亭 萬厯杭州府志在七寶山三茅觀西
左右有門曰凌虛獨步

涵鏡亭 萬厯杭州府志在柳洲亭西北四面皆池
中創一亭

霽雲亭 積翠亭 發幽亭 白雲亭 釋契嵩遊
南屏山記由山麓而上東則霽雲亭西則積翠亭
由積翠亭而上抵於發幽亭由發幽而東至於白
雲亭從麓至頂巖石皆奇世所無有蓋湖山絕勝
處也

居然亭 淨慈寺志宗鏡堂上為蓮花洞有居然亭

秀輿特甚

江湖偉觀亭 萬厯杭州府志在慈雲嶺之巔

清暉亭 錢惟善題清暉亭詩段家亭子近吳山

映發亭 楊蟠西湖百咏有映發亭詩

西水亭 楊蟠西湖百咏有西水亭詩

清芳亭 萬厯錢塘縣志江上有清芳亭

鍾翠亭 錢塘縣志在三茅觀前明孫隆建

贊元亭 錢塘縣志在雲居寺後山頂稱楓林頂明

總制胡宗憲建

望雲亭 萬厯錢塘縣志在金龍山宋謝緒讀書處
曲水流觴亭 嘉靖仁和縣志在縣內尊勝寺又有
望江亭

錦香亭 成化杭州府志在海寧縣署

仰高亭 嘉靖海寧縣志在縣治西廳宋建元時遷
於正堂之後花木森然為遊息之所

瑞隱亭 方干有鹽官王長官新創瑞隱亭詩

漱玉亭

硤川志在紫微泉上宋淳熙中令鍾必萬

建

紫微深隱亭

硤川志在西山百步石右

望吳亭

硤川志在硤石湖北相傳越屯兵於此以

望吳兵水口有望吳壩

泗水亭

海寧縣志在洛塘許睢陽讀書處唐乾元

初公子玟即亭建廟

水月亭

硤川志在湖南宋時設砦處

雙清亭 富陽縣志在縣廳事後宋令程琰植以梅

竹

勝覽亭 折柳亭 咸淳臨安志富陽縣觀山橫截

大江上有亭曰勝覽又山下有折柳亭客使多餞
於此

春山偉觀亭 咸淳臨安志在富陽縣西南又名望

仙亭

近天亭 咸淳臨安志在富陽縣權縣趙師耀建參

政樓鑰書

迎秀亭 宣德富陽縣志前臨大江對峙西南諸峰
據邑治之勝宋令趙汝崖建

會江亭 成化杭州府志在富陽江口據大江之勝
宋令程珌建

孫亭 宣德富陽縣志在亭山因晉處士孫晷得名
稽亭 名勝志稽亭山在餘杭縣南九里上有亭基
秦始皇築以望會稽

鰲亭 晏公類要在餘杭縣南以其在湖中山上因

號鰲亭

咸淳臨安志亦名南亭又曰曄亭聲之訛耳唐貞元初令盧鵬建大滌洞天記晉郭

真君居大滌以虎自隨
晚則虎曄故曰曄亭

部伍亭 咸淳臨安志在餘杭縣東北二里吳將凌

統家餘杭募鄉兵置部伍於此

萬歷杭州府志今其南有部伍橋亭

廢橋
存

放龜亭 咸淳臨安志在餘杭縣南五里石叢起有

類龜形唐貞元中令盧鵬建

望湖亭 萬厯杭州府志在餘杭縣南湖塘上唐寶

厯間令歸珖建

湖心亭 南湖紀遊亭在南湖中望洞霄諸峰若列

屏幃春時水發亭勢若浮

宜霜亭 大滌洞天記洞霄宮東南青檀山東坡與

蔡準吳天常樂富國聞人安道俞康直張日華遊

此後人名其巖曰來賢作亭其上即取坡詩名之

清音亭 餘杭縣新志在大滌洞丹泉池上

咸淳臨安志亭

在洞路之後數丈乃天柱泉發源之實水流沿洞亭間循除以入於沼清冷可愛亭名取左太冲山水有清音之句

鑑亭 咸淳臨安志在餘杭縣南百步清流如鑑

九曲亭 餘杭縣新志在縣西南九曲嶺上宋淳熙

中建

翠蛟亭 明一統志在餘杭縣西宋高宗步月至此

建亭摘蘇軾庭下流泉翠蛟舞之句為名

傾蓋亭 萬厯杭州府志在餘杭縣徑山

綠野亭 蘇軾有宿餘杭法喜寺後綠野亭望吳興

諸山懷孫莘老學士詩

祥光亭 大滌洞天記在大滌洞口宋祥符中中使

至五色雲出自洞中表奏其事因建亭

咸淳臨安志錢武肅

王微時嘗卧巨石上指而言曰異時或富貴當建亭覆此石及衣錦回輿盛飾其石今廢亭下

翠微亭 武林梵志在洞霄宮上

陳堯佐登翠微亭詩谷口停驂上翠

微五雲宮闕闢金扉不知何處朝元會却是龍鸞隊裏歸

瑞亭 中和亭 咸淳臨安志並在臨安縣治南

青亭 東亭 丁峴亭 北湖亭 嘉靖臨安縣志
並在縣之東俱宋建

西亭 東風亭 章村亭 馬溪亭 咸淳臨安志
西亭在臨安縣治西在西北者為東風亭在西南
者為章村亭在東北者為馬溪亭

立玉亭 天目山志在西天目過天關為立玉亭危
道如線趾半垂在外真若羊腸

牛眠亭 真際亭 天目山志在西天目自觀音巖

循牛眠亭而上踰半山橋上真際亭則高麗王問
法高峰時所署者

環錦亭 嘉靖臨安縣志在縣南西新鄉宋邑人俞

氏山園

趙善卞西平俞氏山園環錦亭詩百世垂芳在一經茂林修竹讀書聲園池日涉皆

成趣景物天然分外清聊復垂綸藏渭釣等閒釋耒起莘耕知若自有真良貴豈美斯亭錦得名

迎暉亭 嘉靖臨安縣志在縣北寶林院山南遙見

浙江宋建

豁然亭 嘉靖臨安縣志在縣北二十里福勝寺之

北山宋建

錦野亭 咸淳臨安志在臨安縣西山

錦野亭詩者宋吏部侍郎臨安俞烈若晦為錢氏而作也

空飛亭 咸淳臨安志在臨安縣九仙山上眉山王

楠建

海風江月亭 咸淳臨安志在臨安縣九仙山瀑布

前邑令家之巽建

三休亭 施註蘇詩臨安縣玲瓏山之絕頂名曰九

折巖行百步許有亭下瞰百里名曰三休亭此坡
公詩所云三休亭上工延月九折巖前巧貯風是
也

覽勝亭 嘉靖臨安縣志在縣南龍山巔

望錦亭 萬厯杭州府志在臨安縣南石鏡山之椒

盛果望錦亭詩并引石鏡山崖壁間昔嘗照武肅
而有衣錦之封今遺蹟尚存實亭之舊址也余因
闢而亭之因賦絕句錦壑清風倦鳥還鏡山高
處小亭閒錦南錦北無窮景都在登臨一眺間

月華亭 扶春亭 萬厯杭州府志並在於潛縣舊

治宋寶慶中令方熙建

凌寒亭 繡香亭 成化杭州府志並在於潛縣舊

治宋建

野翁亭 咸淳臨安志熙寧間於潛令刁璿建因東

坡贈詩而創

蘇軾於潛令刁同年野翁亭詩山翁不出山溪翁長在溪不如野翁來住

溪山間上友麋鹿下兔鴈問翁何所樂三年不去煩排擠翁言此間亦有樂非絲非竹非蹴眉山人醉後鐵冠落溪女笑時銀櫛低我來觀政問風謠皆云吠犬足生菴但恐此翁一旦捨此去長使山

人索寞溪女啼

山翁亭 咸淳臨安志在於潛縣圃令張大猷建後

令胡衛易於山巔以臨香亭舊址為之

溪翁亭 咸淳臨安志在於潛縣淳熙初令張大猷
立於縣西北之潘洲

雙溪亭 咸淳臨安志潛之潘洲在二水合流之中
令胡衛築亭其上

款乃亭 咸淳臨安志在於潛縣野翁亭北
潺湲亭 嘉靖於潛縣志在縣治西舊城外

清白泉亭 於潛縣志在嵒嵒山下宋令邵文炳建

邵文炳清白泉記余令於潛方經營浮溪橋廼觀山麓有泉湍泠然因築亭其上其泉甘冽取以作

釀即以清白名其酒云

明秀亭 明一統志在於潛縣元雷山之半

懷謝亭 嘉靖於潛縣志在嵒嵒山南中路世傳謝

安嘗遊此後人因建亭

跨虛亭 疊嶂亭 嘉靖於潛縣志在嵒嵒山塔北

有跨虛亭亭下崖壁數丈有仙人壇殆類鑿成亭

正在石壁險絕處又山上有疊嶂亭

更好亭 萬厯杭州府志在於潛縣清白泉右元皇

慶間建

轉山亭 咸淳臨安志在於潛縣西菩山取東坡路

轉山腰之句

翠微亭 嘉靖於潛縣志在觀山半嶺

招隱亭 萬厯杭州府志在於潛縣柱石山北濯纓

潭上宋參寥子建

春波亭 咸淳臨安志在新城縣登平橋之東端平
元年令陳旼建

識春亭 四并亭 咸淳臨安志新城縣七賢鄉唐
氏林亭也

舒嘯亭 萬厯杭州府志在新城縣東南獅子山至
元間邑丞張世榮建今亭據鼉江上

合溪亭 萬厯杭州府志在昌化縣前雙溪之西又
名雙溪亭宋熙寧六年令陸元長臨溪建宣和四

年令錢冰重建開禧三年令章伯奮建新亭立東

坡祠於上

章伯奮合溪重建新亭記雙溪與縣治相直流淺湍激市居叢雜無幽閒曠遠

之意每凭欄望上流闊處無數百步欲一到未暇也一日有客自遠來語與意合遂駢舟至其處水流無聲綠淨可燭鬚眉極目平遠正在雙澗上下之間面兩峰背武隆野航漁舟日夕往來雲烟收抹頃刻異態舟行容與近一里許石紺白色平鋪水底日光下澈波影內見金綠映漾若織女浪沫循平流徐行散點若殘雪不銷者久之直後夾以蓮蕩屈曲橫直十數畝或水暴漲巨魚自溪沂流而入掉尾鼓鬣以萬計渡溪至南屏山巖壁峭立古木自石出枝幹瘦硬盤屈冬少霜凋之葉幽靜奇絕之觀間見層出不可名狀而前人未有收拾品題之者抑山水顯晦自有時乎於是自雙溪取

徑傍東坡泉登薦菊亭由象賢菴跨二橋沿流而入芟翳規址作亭其上勝以合溪或謂唐昌山水之勝萃於此矣余聞去縣十里有灘曰洗耳橋曰白牛山曰箕山問其人則曰巢許嘗隱於是故名雙溪自得東坡詩而山水為之增輝亭亦賴以不朽余無巢許之高操東坡之盛名今合溪之名既以余辱後必得如東坡者品題之而後始重庸書以俟

鏡紅亭 咸淳臨安志在合溪亭之後藕池可徑一里令章伯奮建取韓詩平鋪紅蕖蓋明鏡之句

薦菊亭 咸淳臨安志循雙溪而上溪側有窪其泉甘冽東坡行縣至此嘗酌以試茶開禧二年令章

伯奮作小亭其左取東坡詩一盞寒泉薦秋菊之義

芳洲亭 倦飛亭 芑筍亭 昌化縣志並在合溪

亭南岸之中洲俱宋令章伯奮建

清暉亭 咸淳臨安志在昌化縣水南道院東令錢孜建

捲雪亭 咸淳臨安志在昌化縣南屏之麓

滴翠亭 咸淳臨安志在昌化縣南屏山宋淳熙中

欽定四庫全書

卷四十

列女傳

令錢攷建

名勝志青山即唐山在雙溪南岍名南屏山熙寧間令陸元長臨流建有新亭

淳熙中錢攷易其名曰滴翠

許由亭

咸淳臨安志在昌化縣晚溪去縣西九里

旁有箕山舊傳巢許隱此卞令圖經云以許遠游嘗居此山遂有此名蓋得之矣

頒春亭

萬厯杭州府志在昌化縣宋高宗賜邑令

錢昭祖禪羅山茶昭祖因建亭以榮君之賜其處

今莫考

聚遠樓 玉堂雜記德壽宮一樓巍然宋高宗名之

曰聚遠自題其額大書蘇軾賴有高樓能聚遠一

時收拾與閒人之句於屏

周必大端午帖子聚遠樓高面面風冷泉亭下

水溶溶人間炎熱何由到真是瑤臺第一重

東樓 咸淳臨安志在舊府治中和堂之北一名望

潮樓圖經云一名望海樓太平寰宇記望潮樓高

一十丈唐武德七年置

白居易初領郡政退衙登東樓作鰥惻心所念簡牘

手自操何言符竹貴未庀州縣勞賴是餘杭郡臺榭逸官曹凌晨侵政事向晚恐遊遨山令微有雪

波平未生濤水心如鏡而千里無纖毫直下江
散閣近東樓更高煩襟與滯念一望皆遁逃

清暉樓

古蹟考在舊府治唐郡守嚴郎中建

白居易

十八郎中在郡日改制東南樓因名清暉未立標
榜徵歸郎署予既到郡性愛樓居宴游其間頗有
幽致聊成十韻詩嚴郎制茲樓立名曰清暉未及
署花榜遽徵還粉闌去來三四年塵土登者稀今
春新太守灑掃施簾幃院柳烟婀娜簷花雪霏微
看山倚前戶待月闌東扉碧窗憂瑤瑟朱闌飄舞
衣燒香捲幕坐風燕雙雙飛君作不得住
我來幸因依始知天地間靈境有所歸

香遠樓 咸淳臨安志在府治舊為玉蓮堂安撫魏

克愚撤去咸淳七年安撫潛說友即弗址為樓取

濂溪香遠益清之語名之為郡治最佳處

明新樓 劉基杭州路重修府治記中憲大夫寶珂
公名其偃息之樓曰明新

福星樓 咸淳臨安志在兩浙轉運司治淳祐間運
判尹煥建

平遠樓 咸淳臨安志在通判北廳

南樓 咸淳臨安志在通判南

十三間樓 武林舊事在石佛院東坡守杭日每治

事於此有冠勝軒雨亦奇軒

郭祥正十三間樓詩
高樓挿湖脚紺碧十

三間待月客無
寐看山僧自閒

望湖樓 乾道臨安志一名看經樓乾德五年忠懿

王錢氏建去錢塘門一里

武林舊事先得樓即古
望湖樓東坡詩望湖樓

下水如天是也董嗣杲西湖百咏引先得樓即錢
塘正庫酒樓潘閬望湖樓詩望湖樓上立竟日懶
思還聽水分池界看雲過別山孤舟依岸
靜獨鳥向人閑回首重門閉蛙聲夕照間

湧金樓

乾道臨安志政和六年郡守徐鑄以豐豫

門樓隳損命鈴轄楊靖重建頗極壯麗榜曰湧金

樓

豐樂樓

方輿勝覽在湧金門外瞰湖楊靖建

武林舊事

舊為衆樂亭又改聳翠樓政和中改今名咸淳臨安志樓據西湖之會十峰環繞一碧萬頃柳汀花馬歷歷欄間而游撓畫艦榷謳隄唱往往會合於樓下為游覽之最顧以官酤喧雜樓亦平小弗與景稱淳祐九年趙安撫與憲始撤而新之環麗宏特高切雲漢遂為西湖壯觀其旁花徑曲折亭榭參差與茲樓相為映帶搢紳多聚拜於此夢梁錄豐樂樓酒樓名也臨安酒樓中瓦子前武林園向有三元樓次有南瓦子熙春樓新街巷口有花月樓融和坊有嘉慶樓聚景樓金波橋有風月樓靈椒巷口有賞新樓壩頭西市坊有雙鳳樓下瓦子前有新樓汴京茶樓酒肆皆有裝飾至今倣倣成

俗也釋仲殊豐樂樓寒食許長情詞湧金門外小瀛洲寒食更風流紅船滿湖歌吹花外有高樓晴日煖淡烟浮惹嬉游三千粉黛十二闌干一片雲頭

迎光樓

武林舊事在北山路張循王府

半湖樓

朱繼芳半湖樓詩四明仙客此樓居畢竟

西湖壓鑑湖

映江樓

萬厯杭州府志在候潮門外宋時有扁曰

烟雲魚鳥元至正中重建改名瞰江

天開圖畫樓

成化杭州府志在吳山梓潼廟上

松聲樓 錢惟善有松聲樓詩

黃篾樓 名勝志在赤山埠浴鵠灣元張伯雨居此

劉邦彥黃篾樓詩春水初生浴鵠灣篾樓高枕對青山鳥聲啼足忽飛去門掩綠陰清晝閒

明遠樓 戴表元杭州佑聖觀記觀之地舊有明遠

樓昔阜陵嘗讀書其間

夕佳樓 武林梵志在南天竺山下演福寺舊址徐

一夔有記

鎮海樓 萬厯杭州府志在吳山東麓舊名朝天門

錢氏建元至元間改為拱北樓明洪武八年改今

名

張伯淳拱北樓詩縹緲樓臺十二闌舉頭人在鳳池班天風不隔尋常眼辰極長浪咫尺顛更

點分明關政事規模雄壯壓江山東南民物瞻亮日乞得餘光萬里還

齊樹樓 萬歷杭州府志在石屋嶺正德間方豪建

瑞石山樓 西湖八社詩集祝時泰有瑞石山樓望

江詩

樓外樓 錢塘縣志在湧金門外山陰祁氏別墅

黃鶴樓 太平寰宇記黃鶴山舊有黃鶴樓

百尺樓 名勝志百尺浦在鹽官縣西四十里背越

王造百尺樓於此以望海

西翠樓 貝瓊西翠樓記海昌郭子振葺居第之西

偏小樓顏曰西翠距邑西百里為吳興其七

開

在閘楯之外如拱於西也

海山一覽樓 硤川志在審山觀海峰絕頂

山間明月樓 硤川志在審山岳廟後即五岳樓

遐觀樓 嘉靖海寧縣志在惠力寺山門外

丹井樓 嘉靖海寧縣志在審山

天開圖畫樓 硤川志海寧西山廣福院東宋天禧

間建元趙孟頫書額

同璦天開圖畫樓詩清明無雨試登山丹井西頭一扣關

石戴樓臺飛鳥外天開圖畫白雲間娉婆子落陰初合躑躅花繁色尚殷且喜遠公能入社許余酤

酒駐酤顏

翫江樓 餘杭縣新志在通濟橋南面瞰苕溪宋令

柳耆卿建

風琴樓 成化杭州府志在於潛縣署

會心樓 咸淳臨安志在於潛縣治東

洪咨夔會心樓記潛負天

目支峰縣治前繚鳳凰青山右峙峯巒三面騰躍峻拔多奇觀東山獨庠伏不稱昔嘗作近民樓以亢厥勢而地迫囂雜非宜今令荆溪張君本來憑高周覽乃於東麓為重屋三間飛跂縹緲脫氛壒而接雲氣扁以會心其下軒窗靚深山磻斗立北有靜涼亭取徑於亭陟級而升於樓羣山奔奏一覽而有其成也以紹定辛卯云

慶豐樓 萬厯杭州府志在新城縣杜公祠側

滴翠樓 咸淳臨安志在昌化縣程琬有堪村徐氏

滴翠樓記

儒賢亨會之閣乾道臨安志故相劉正夫之居在
萬松嶺東青平門政和三年勅建御書閣賜是名
望海閣 乾道臨安志在漕臺舊治

紅梅閣 古蹟考在府治石林軒側

竹山閣 咸淳臨安志竹園山在府治西南安撫趙
與憲建閣其上平鑑西湖

竹閣 咸淳臨安志孤山廣化寺後白公居易建今

與寺俱徙

董嗣杲樂天竹閣詩此君玉立此樓空
不復幽眠想白公百尺有簷侵碧落千

竿無語足清風
闌尖亭影流漁屋
龕面祠香託佛
宮石琢端平丞相
記都歸寶慶守臣
功自注竹閣
有鄭清
之記

燕思閣 沈邁有杭州燕思閣分題詩

風雲慶會閣 齊東野語楊和王建第清湖洪福橋

復建傑閣收藏御劄揭上賜風雲慶會四字於上

小蓬萊閣 武林舊事在孤山路四聖延祥觀

挹翠閣 遂昌雜錄孤山之陰臨水閣上下皆拱斗

砌成極為宏麗蓋盧董二璫以內庫錢建太乙宮

以其餘資建此閣

四照閣 方輿勝覽在孤山巔

太倉孫米集詩注孤山之巔舊有闢氏四

照閣項年部使者獻西湖圖神廟問闢氏四照閣安在其知名如此昨過山下見緋衣荷鍤數百人

問之則軍中藏冰於此也鄭解四照閣詩湖山下之絕境羣山遠湖十百重碧笋四插明鏡裏此

閣正落明鏡中當軒不置窗與檻湖光山翠還相通側耳似聞天仙語按手便欲翻長空

謹按鄒浩道鄉集作四照亭其詩有孤亭縹緲枕烟霞之句其地據孤山之頂即今

御書雲峰四照亭址是也雍正八年建十年賜額總督臣李衛奉懸亭上

西閣 咸淳臨安志在孤山之上又名彌勒閣有石

塔七層

釋志文西閣詩楊柳蒹葭覆水濱徘徊南望倚闌頻年光似鳥翩翩過世事如棋局

局新嵐積遠山秋氣象月生高閣夜精神驚飛一陣鳬鷺起蓮葉舟中把釣人

天然圖畫閣 萬厯杭州府志在保叔塔傍

鏡花閣 武林梵志法相寺沿塢而上為鏡花閣古

梅參差湖波掩映亦佳境也

望海閣 萬厯靈隱寺志在北高峰頂

清隱閣 楊蟠西湖百咏有清隱閣詩

梅閣 徐一夔梅閣記按察副使何公晏居之所

白閣 朗閣 萬厯錢塘縣志西湖有唐宋二十九
閣惟稱竹閣今則有邵重生之白閣吳之鯨之朗
閣兩人庶無愧云

清涵萬象閣 癸辛雜識先君出宰富春重建合江
驛驛後為大閣扁曰清涵萬象

雙明閣 富陽縣志在觀山舊主簿廳宋紹興中楊
簡主簿富陽館陸九淵於此相與論學後人因名
傳心亭

龍游閣 四朝聞見錄高宗游幸徑山寺僧因建龍

游閣

艮山閣 家之巽有題艮山閣詩見嘉靖臨安縣志

初陽臺 遂昌雜錄葛嶺直上為初陽臺相傳葛仙

翁登此吸日精月華臺有亭盡得西湖之勝

西湖志在

葛嶺之巔每歲十月朔觀日出真奇觀也張昱登初陽臺詩初陽臺上新亭好一曲笙簧石壁開鷺

起元真狂道士步虛飛下玉清臺

渾儀臺 錢塘縣志在吳山至德觀元丞相達實特

穆爾重建有測驗渾儀所

繙經臺 名勝志飛來峰介靈隱天竺之間高數十

丈謝靈運繙經臺在焉

董嗣杲西湖百咏引臺在下竺香林門道裏靈運於

此將北本涅槃經翻為南本三十七卷因有七葉堂

飯猿臺 萬厯靈隱寺志在呼猿洞西天竺師慧理

畜白猿因起臺寺中舊施食於此

超然臺 萬厯杭州府志在石筍峰

大觀臺 錢塘縣志在紫陽山頂左江右湖據會城

之勝

畱月臺 名勝志在萬松嶺上夾道植松有八盤徑

看松臺 名勝志在寶石山俯臨巨壑仰拂松梢

懷山臺 陳起有過三橋懷山臺詩

琴臺 淨慈寺志在慧日峰西怪石聳秀上有石壁

刻米元章琴臺二大字

越王臺 萬厯錢塘縣志在大慈山巔

仙臺 硤川志在海寧縣西山紫微洞上馬自然登

眺處

張九成讀書臺 名勝志海寧縣菩提山上

分經臺 天目山志在東天目即梁昭明分梵本金

剛經處

仙人臺 晏公類要在臨安縣西五十里居人夜中

或聞琴瑟之音

畫錦臺 嘉靖臨安縣志在縣傍七十步錢武肅王

築

臨安縣志縣有十錦皆由武肅衣錦還鄉而名衣錦營衣錦山衣錦南鄉衣錦北鄉錦溪錦橋

畫錦堂畫錦坊保
錦山衣錦將軍樹

捲雪臺 咸淳臨安志昌化縣中洲南屏之麓宋淳

熙六年令錢孜建

吳慶忌宅 咸淳臨安志故老云豐儲倉即吳慶忌

故宅基前有池相傳是慶忌磨劍處

謹按豐儲倉在宋仁和縣署側今城內倉橋之東是也又考七修類稿載褚家塘土地祠掘得古碑云瓊花園即慶忌舊宅基是慶忌宅當在城內今志有稱在錢塘門外霍山者乃慶忌塔非宅也

褚遂良宅 成化杭州府志褚家塘相傳褚遂良故

宅在此

丁翰之宅 萬厯靈隱寺志在龍泓洞陸龜蒙有丁

隱君歌

沈崧宅 咸淳臨安志沈家塘在北關吳越右僕射
沈崧故居又名沈蕩灣

郎簡宅 清波別志簡字叔廉晚年即城北治園廬
號武林居士孫沔為守日榜其所居坊曰德壽

林逋宅 和靖集序君復不仕結廬孤山所居有巢

居閣處士橋

青箱雜記王隨知杭日訪其廬見其
顏敞出俸錢新之林逋深居雜興六

首并序諸葛孔明謝安石畜經濟之才雖結廬南
陽搗鼓東山未嘗不以平一宇宙躋致生民為意
鄙夫則不然胃腹空洞翦然無所存置但能行樵
坐釣外寄心於小律詩時或鏖兵景物衡門情味
則倒睨二君而反有得色凡所寓興輒成短篇總
曰深居雜興六首蓋所以狀林麓之幽勝攄几格
之閑曠且非敢求聲於當世故援筆以顯其事云
隱居松籟細靜然何獨微之重碧鮮已被遠峰擎
巉巉更禁初月吐娟娟門庭靜極霖苔露籬援涼
生藁菊烟中有老夫披白裕瘦行清坐咏遺篇四
壁垣衣釣具腥已甘衡泌號沉冥伶倫近日無侯
白奴僕當時有衛青花月閒懷看酒譜雲蘿幽信
寄茶經茅君使者蕭閒甚獨理叢毛向戶庭薄夫
何事苦姦姦一室琴書自解顏峰後月明秋嘯去

欽定四庫全書

卷四十

水邊林影晚。樵還文章敢道長。於古光景渾疑剩。
却閑多少烟霞好。猿鳥令人惆悵。謝東山丹丹秋。
雲抱嘯臺一丘松竹是閑媒。誰聞濟北傳兵畧。枉。
說山東出相才。樵褐短長披。搥膝丹爐高下壘。懸。
胎三十功行無圭角。可望虛皇九錫來。上書可有。
三十牘下筆曾無一百函。閒卷孤懷背塵世。獨營。
幽事。傍雲巖僧分乳食。來陰洞。鶴觸茶蘚落蠹杉。
未似周顒少貞勝。北山應免略相街。松竹封侯尚。
未尊石為公輔。亦云清華自合論。閑客元墨何。
妨事。靜君鶴料免慚尸厚祿。茶功兼擬策元勳。幽。
人不作山中相。且擁圖書卧白雲。祝時泰訪林處。
士故宅詩湖畔。訪逋仙晴攀林外烟。亭畱放鶴處。
花憶種梅年。故宅餘芳草。高祠列。
四賢巢居不可作。名共此山傳。

徐復宅 避暑錄話徐復號冲晦處士宋仁宗朝名

見賜號而歸杭州萬松嶺是其故廬也時和靖處士尚無恙湖南湖北隱廬相望一時稱二處士

潘閬宅 夢梁錄在潘閬巷後人即其宅基立為祠

徐與宅 咸淳臨安志在大隱坊

韓世忠宅 武林梵志在江漲橋宋韓蘄王之賜第後捨為真如寺

吳琚宅 四朝聞見錄琚為憲聖后猶子居近城與東樓平因城疊石曰南麓後為嘯臺下有堂曰讀

書亭曰物表西直吳山有茅頂而圓者曰定菴

鮑當宅

泊宅編在清波門外鮑當郎中故居

方勺寓杭

創一小園即當故宅也

喬行簡宅

武林梵志在吳山之陽奇石峭拔東望

海門宋紹定間理宗幸其第書見滄二字勒之崖

石後捨宅為寺名寶奎

周煇宅

清波別志後序煇居清波門因著清波三

志

清波雜志自序煇祖居錢塘後洋街

貫雲石宅 嘉靖仁和縣志在鳳凰山下今之海鮮

寺乃其故居

黃公望宅 錢塘縣志南山筲箕泉側

王蒙宅 嘉靖仁和縣志蒙字叔明文敏之甥善畫

其宅近黃鶴山因號黃鶴山樵

仇遠宅 嘉靖仁和縣志仇遠字仁近卜居白龜池

上

仇遠卜居詩一琴一鶴小生涯兩巷深居度歲
華為愛西湖來卜隱却憐東野又移家春城雨

滑難騎馬小市天明又賣花阿母
抱孫閒指點疎林盡處是烟霞

楊維禎宅

李暉題楊廉夫隱居詩飲馬橋南水亭

好

徐一夔宅

嘉靖仁和縣志一夔織工對文云余僦

居錢塘之相安里今考相安巷乃仁和地也

褚無量宅

太平寰宇記臨平湖在鹽官縣西褚無

量家近湖邊年十二湖中有龍鬬傾里觀之無量

獨讀書不輟

趙忬宅

硤川志忬於建隆時有翼戴功因賜第名

趙家滙

楊九鼎宅

硤川志宋南渡楊由義子九鼎選為尉

馬都尉賜第楊園里人稱尉馬基

榮肇宅

硤川志元祭酒榮肇故居在硤石鎮宋濂

有贊

許或宅

咸淳臨安志富陽桐江之水東注桐洲通

孝子許或故廬

申屠氏宅

名勝志富陽縣申屠山昔申屠蟠晦黨

銅之名避地結廬於此今千載子孫家焉

謹按咸淳志富陽屠山相傳有姓申屠者結廬以居乃以名其山復志其里攷後漢書蟠傳只言絕蹟梁碭之間後二年滂等果罹黨錮未嘗至富陽名勝志蓋附會也

謝絳宅 咸淳臨安志富陽縣小隱山謝絳遷居於

此子景初景溫築書室於山半今故基雙松尚存

謝絳自題讀書室詩余近營別墅於小隱巖忽憶癸酉冬奉詔使金於陳橋驛夢中偶賦及寤寫在牘背今因巖名知所賦三言前契矣遂足為八句僕本塵外士功名若毫末因尋小隱園忽見羣芳發昔夢宛可記靈契方茲達會須挂朝纓歸弄巖前月又雙松亭詩築居喜物外披徑窮木末層阜

繞襟帶澄江見豪髮芬芬山蜜熟決決春泉活林梢閃閃猿石罅慙街月坐長百慮寂望遠孤興發何必較萬殊吾自思吾達又答梅聖俞問隱詩聖俞一幅書問我小隱居小隱詎有異策室數畝餘巖壑不峻粹田園非美腴所欲近丘墓歲時來掃除先人夢讀史尊道本聖徒絕筆於此詩子孫無忽諸刻石置中堂且使過者趨題榜為服訓義取銘盤盂後嶺雙松亭徑街何逶迤迂下臨富春渚萬象生有無東偏作草舍可以施琴壺門前碧塘水萬本栽荷葉風來觸香氣長著人衣裾澄水泱泱流黍稻可勿枯柔桑及美果種廣莫記株澗草不識名野禽多異呼坐此易歲宴自與人世疎在昔東陵侯瓜壠猶親鋤楊惲謝九列種豆南山隅余嘗有此志來者安敢誣誅茅實張本解組當後圖是時考槃賦從我者誰歟近來傳越石趣尚若不殊倘聞邱樊往不顧升斗儲如君美才具日月升

欽定四庫全書

卷四十

雲衢安敢預招
挽粗自陳其愚

諸葛起宅

餘杭土風記餘杭縣岑山吳步兵校尉

諸葛起字岑世居山旁宗族蕃盛皆葬於此

吳筠宅

名勝志餘杭縣石室洞華陰道士吳筠居

此又名藏書洞

太平寰宇記筠餘杭人為唐內供奉因游天柱宮樂馬後葬於此今

有碑
存

郭文宅

水經注浙江逕縣左合餘干

疑作餘杭

大溪江

北即臨安縣界水北對郭文宅宅傍山面溪宅東

有郭文墓又縣南有大壁山

即大
滌山

郭文自陸渾遷

居也

謹按文居凡數處一云餘杭由拳山見元和志一
云新城縣靈耀寺見類要一云臨安縣郭山墓亦
在見名勝志此即水經注所云傍山面溪宅東有
墓者是也郭山之名出自後人因文而名之耳然
據水經注文宅已有二矣攷晉書本傳文本河內
軹人入餘杭大壁山中窮谷之地而居焉後王導
迎置西園凡七年逃歸臨安結庵山中縣令萬寵
迎至縣中病甚求還山終後寵葬於所居之處據
此則文初至餘杭後至臨安本傳
與水經注悉合故據水經注登載

許邁宅 名勝志臨安縣西五里有西山多仙人芝

草晉許邁移居於此

昌化縣志縣西晚川山下有許遠游宅

張道陵宅 名勝志在於潛西天目山南峭壁高二

百餘丈乃漢天師張道陵隱室旁有張公小舍

洪載宅 咸淳臨安志在於潛縣天目西麓舊為紫

薇巖俗呼紫草巖寶福寺在右可菴在左皆玲瓏

奇狀不一

俞烈可菴記臨安天目山之西麓有逸民洪載字彥積自號耐翁以力農起衣

食屋屋給愛泉石若嗜欲相攸紫薇巖之左得佳山峭壁稜層圭角冒土欲出荔鮮碧潤斑斑呈露翁放杖太息曰是必有異呼奴具畚缶厲斤斧剪雜榛翳輦除土礫則峰巒效奇直如立筍平若截

肪岑銳巘疊爭見姿態既有端緒則銳意欲成之
湊歲儉飢鳩旁近村民用錢移擔土以漫治凹

下灌樹蔽翳既芟除之泉脉欲流復醜導之則平
行清深嵌巖宛曲各有奇狀於是名其石之翼然
欲升者曰飛雲峭然凝竚者曰玉筍窈然清深命
曰凹然深邃命曰經龕山有峭立石壁而有

形屬巖蹲負其下者曰金龍泉眼流珠滅沫不為
旱潦增損命曰靈泉開微徑上飛雲頂築亭其巔

名曰盤雲取樂天牛氏石記盤坳秀出如靈丘鮮
雲之意巖石之下小築數椽扁曰可菴翁燕遊藏

息之地也菴之東數步曰長春塢西瞰清池曰含
暉室徑直前依山植桃數十百株方春和時霞錦

燦爛名曰小桃源稍西則為歸藏之闕始翁得此
地神怡意適謂是已足吾心計當生死此中坐而

對石則眼恍然明因而支石則意灑然醒客或扣
門管領登山擊鮮醉醺必極其酣適然後已聞客

譽石之辭則喜津津見顏面每疑其嗜好之異其中必有自得其道機轉物能與此石俱消忘者歟
諸吾廬請記不已者翁之孫咨夔以儒學登第且試學官中其科今分教饒學與子交好遂為之記

凌準宅 咸淳臨安志在新城縣西五十步唐柳宗

元有弔凌司馬準詩

羅隱宅 名勝志在新城縣東五里

新城縣志在雞鳴山下今改名

學山許廣淵羅隱故宅詩廢宅百年後荒基一畝平獨憐新檜栢誰識舊軒楹閭里清風在溪山秀氣明當時苦吟夜應使鬼神驚凌誌羅昭諫舊居詩題山詠水遍天涯誰識東安是舊家半畝荒基
山寂寂夜深
風雨落梅花

葛塢

晏公類要在靈隱山吳方士葛元隱居

陸羽
二寺

記葛洪亦居此郭祥正葛塢詩二葛繼成
仙猶存丹竈處有時化鶴來徘徊不知去

朱野

咸淳臨安志在靈隱山梁隱士鹽官朱世卿

之別墅

阿姥堆

神仙傳晉初有裴氏姥採衆花醞酒忽有

三人至姥所授藥數粒姥餌之仙去今堆上花草

猶存陰雨時或聞酒香

淨慈寺志仙姥
墩舊在長橋東

杜牧塢

咸淳臨安志南山與佛日山夾徑世傳牧

墓在此無可考

鮑家田 武林梵志在錢塘門外吳越相鮑君福之

陽田

吳濟鮑家田詩搖旆家家酒扶犁處處村草深迷井口槿密擁籬根綠水明秧本青山失

燒痕多應忌蠶事避客掩柴門

柳林 咸淳臨安志在錢塘門外

松門 四朝聞見錄九里松一字門扁吳說所書高

宗欲自為書無以易說乃命金填其字復揭於門
萬厯靈隱寺志松門唐刺史袁仁敬立名袁公松

門陳贊和題九里松門詩刺史袁君有古風沿湖
九里植蒼松涼颼度處琴調韻積雪晴時發印
蹤一路波濤聲謾謾兩行幡蓋影童童
森然總是徂徠種想與秦封不共宗

劍門關 咸淳臨安志在棲霞嶺舊多桃花爛然如
霞

桃花關 咸淳臨安志在南包山冷水峪有桃花關
上有蒸霞二字

江湖偉觀 遂昌雜錄保叔塔山上壽星寺西陟磴
而上為江湖偉觀蘇文忠所謂一舸鷗夷江海去

尚餘君子六千人今則磴道不復存矣

董嗣果西湖百咏引

江湖偉觀在壽星寺最高處原名觀臺後圯矣至
淳祐十年改建其上更創兩亭直至山椒車若水
題江湖偉觀詩十年不向此凭闌景象依然一望
間龍蜃吐雲天入水樓臺倒景日街山僧於解寺
難為隱人在扁舟不是閒孤鶴似尋和靖宅盤空
飛下復飛還未繼芳江湖偉觀詩吳山表裏水為
池百有餘年壯玉幾天目遠將雙鳳落海門近拱
五雲飛胥濤白雪生秋思太乙紅霞駐夕暉江上
沙鷗湖上舫柳
邊花外兩依依

鄴公菴 萬厯靈隱寺志宋守祖無擇建在石笋峰

有東坡少游魯直畱題文與可畫竹

東坡菴 咸淳臨安志東坡既名六一泉又於泉後
築室自名東坡菴

岫巖山房 萬厯靈隱寺志靈隱澗西李元昭結廬
於此

藕花居 錢塘縣志在南屏即南港孫太初之鶴渚
在焉南屏有八景為鶴渚中峰慈門琴臺古塔長

橋蓮洲藕居俱稱勝景

王守仁藕花居詩掩映紅粧莫漫猜隔林知是藕花

開共君醉卧不須扇
自有香風拂面來

半道紅 吳越備史在北郊舊植桃花之所

陶家廂 西溪百咏注在畱下禁酒碑後宋理宗朝
有陶處士隱此建水竹居

楊圩 西溪百咏注楊統制宋之功臣兄弟和睦各
置一圩在西溪北

馬塍 咸淳臨安志有東西馬塍在餘杭門外土細
宜花都城之花皆取焉或云塍當為城蓋錢王舊
城餘杭門外地與此相接

劉泰馬塍看花詩一溪
流水繞芳塘誰種溪南

十畝桑樵谷暗通三竺寺人家住近百花莊偶隨
碧草尋詩去却愛青林煮酒香便典春衣拚醉倒
傍人慣識
杜陵狂

流觴曲水

戴表元楊氏池堂燕集序雪周密公謹

與杭楊承之大受有連依之居楊大受和王諸孫
共居近苑籓多引外湖之泉以為池環迴斗折雖
在城市而具山溪之觀流觴曲水者諸泉之最著
也公謹安之大受損其地之西偏使自營別第公
謹遂為杭人

宴居 畱青日札廬陵張昱至正間為浙省員外張
士誠時棄位不仕所居在今城中花市名曰宴居
古仙壇 顧況有題臨平塢古仙壇詩

讀書林 萬厯杭州府志讀書林有二一在海寧縣

治西廳一在昌化百丈山下宋唐閻於百丈溪理

耶茨讀書故名

鍾必萬縣治讀書林詩簿書叢裏讀書忙驚散庭前雁驚行獨有蒼

官與青女對人
依舊立斜陽

觀濤所 太平寰宇記富陽縣石頭山有觀濤所

桑亭埭 太平寰宇記在富陽縣漠末有桑君養犬
數年不吠孫文臺經此犬忽吠之桑曰君其異相
乎及貴欲報桑知其好張簞捕魚為作九里簞以
貺之

藥圃 咸淳臨安志在餘杭縣大滌洞東山之前夏
侯天師種藥於此芝畦朮塢百藥之植靡所不有
嘗言古人以上藥養神中藥養性下藥遣病自賦
藥圃詩云綠葉紅英遍仙經自討論偶攜巖畔菊

鋤斷白雲根至今圃蹟猶存

茅嶺洞室 杭州府志在臨安縣垂雷山晉許邁築
精舍與陳安世茅李偉往來於此

洪氏山房 咸淳臨安志在於潛縣寶福寺洪舜俞

聚書其中魏鶴山為記

魏了翁洪氏山房藏書記
寶慶元年吾友洪舜俞自

考功郎言事罷歸於潛讀書天目山下寶福僧寺
寺觀深舜俞合新故書得萬有三千卷藏之 闕復

閣下如李氏廬山故事
而移書於靖屬余記之

東林 萬厯新城縣志在縣西廣陵鄉淨嚴院施肩

吾招徐凝同游有詩

東坡林 昌化縣志在治平寺後舊有東坡手書石

刻因名

藏春塢 咸淳臨安志在昌化縣宋欽雲老有徐氏

藏春塢詩

隋朝檜 天竺寺志在下天竺寺宋大中祥符間復

茂號重榮檜

葛仙翁虬松 錢塘縣志在西湖履泰將軍廟前相

傳仙翁所植

宋銀杏 武林梵志城內水陸寺銀杏二株甚巨宋

時物也

錢王鐵幢 吳越備史王射潮箭所止處嘗立鐵幢

後人因名鐵幢浦

徐一夔鐵幢辨舊臨安志云吳越王鏐用强弩射潮箭止處立

鐵幢以識又云錢氏子孫言築塘時高置鐵幢三
以為水則在今利津橋北者其一也其地舊名鐵
幢浦幢制首圓如杵徑七八寸首出上三尺餘趾
皆陷土故老曰初置幢時塘猶未成慮潮盪幢用
鐵輪護幢趾以鐵絙貫幢幹且維絙石捷然後寬
上築塘故幢首出土宋淳祐間趙安撫作亭覆幢

今平為民居而鐵幢之首嶄然出窪池可驗幢本有三一在舊便門街東南小巷今巷尚名鐵箭一在薦橋門外皆埋塞僅存在利津橋者若不表識亦埋塞矣近有指此幢為箭幢首為鐵不思方射潮時已逐潮去箭烏能存且鏐雖英雄一時精誠所激豈有異於常箭哉又謂幢首可撼而不可拔以為神不察其下關鍵故也乃惑夷堅志之說謂此矢拔則龜目紅尤謬

辟塵爐 錢塘縣志在六通慈德院非木非石叩之
錚然纖塵不染

岳墳檜 舊浙江通志在鄂王墓前明天順間杭州
同知馬偉鋸而植之以示分檜屍狀號分骸檜至

今猶活

鐵井闌 明一統志在六和寺南昔有蛟龍自井出
攻損江岸錢氏鑄鐵井闌鎮之刻八卦於上

仙人碁 明一統志在府城西五十里山上以丹砂
為局路黑白碁子皆在

葛仙翁六竈 嘉靖海寧縣志在縣東北十六里相
傳仙翁遺蹟

迴紋壁 海寧縣志在惠力寺正殿高三丈闊四丈

砌法迴紋如織千年以來巍然不動人以為公輸神蹟

唐朝杉 咸淳臨安志在洞霄宮外

唐朝櫟 大滌洞天記在洞霄宮外相傳唐咸通二年吳天師種宋咸平中自枯至祥符壬子復榮漕使陳堯佐圖狀進呈號重榮木

神應鐘 杭州府志唐大厯間旱禱於大滌洞既雨神見夢謂宜范金為鐘以報宋宣和間燬紹興中

重鑄赤城左蟠為記

唐雙檜 泊宅編鹽官安國寺雙檜唐宣宗時悟空
禪師手植宋宣和中朱勔取以供進由海道遇風
濤檜淪於海

悟道松 杭州府志在臨安縣葛稚川修仙天目每
坐松頂高吟因名

吳越將軍木 咸淳臨安志在石鏡山錢王幼時所
戲大木後貴封為衣錦將軍

牧嶺古松 舊浙江通志在於潛縣南有兄弟欲訟

有司夜憇訟下遲明各悔而還時名松為木長官

謹按古蹟一門舊志俱無定例如洲池井石當入山川隄塘當入水利鐫刻當入碑碣書院神祠佛塔當入學校祠寺各門分載翻多罣漏矣今從陳善杭州府志之例以古城首次以故都舊治又次以園館堂齋軒亭樓閣以及於故宅其不屬於類者雜叙於末而以古物終焉遵

皇輿圖表敘各縣之先後次第十一府總此例也惟古治縣名不同故以朝代冠之庶知所考焉

浙江通志卷四十